

四庫全書

史部

欽定四庫全書

續資治通鑑長編卷九十二

宋 李燾 撰

真宗

天禧二年五月壬戌朔令淄州刺史知登州范昇與比部員外郎知淄州王穆兩易其任時知青州李士衡言登州仍大旱歉昇武人不閑治道故也

范昇或作花昇當考

詔

曰民勤稼穡家有儲峙所以備流行之災而末俗澆淳

軍務蓄積歲或少歟便至流亡豈教導之方未甚篤也
今未麥將登令所在長吏躬親勸諭無使復然 刑部
員外郎兼侍御史知雜事呂夷簡守本官同勾當通進
銀臺司兼門下封駁事度支郎中杜夢楨兼侍御史知
雜事夷簡與中丞趙安仁近親避嫌也

癸亥詔祥源觀先營正殿餘俟明年興葺

甲子成德鎮寧等軍節度使太尉尚書令徐王元偓薨
先是宮邸遺燼燔舍數區元偓驚悸暴中風眩不能言

上憂之親視者數四及是臨奠慟哭贈太師尚書令追封郡王謚曰恭懿葬日御製挽詞元俚姿貌偉異沉厚寡言樂善多藝知音律既歿詔取生平歌詩文記纂為六卷及墨跡三卷親製二序藏之秘閣

丁卯命宰臣王欽若管勾修祥源觀事 右正言劉暉

言前世傳聖水者皆詭妄不經今盛夏亢陽不宜興土木以營不急疏入不報又當建議罷提點刑獄官禁民棄父母事佛老者皆不行 夔州路轉運使言順州蠻

田彥晏等齎彭儒猛狀哀訴求歸順乃下詔釋儒猛罪
仍加錄用令高州等處諸族蠻人以此招諭如挈屬來
降願給田耕鑿或却還溪洞皆聽從便其招諭之人亦
遞加酬獎

壬申廣德軍三管內祠山廟承前民施牛二百頭並就
與民戶每歲一牛輸絹一匹或經三十年牛斃而猶納
絹欲望歷十五年已上者並除之詔可

甲戌以荆湖北路提點刑獄權轉運司事屯田員外郎

江嗣宗為都官員外郎辰州都巡檢供備庫副使李守元為西京作坊副使內殿崇班閤門祇候知辰州錢絳為內殿承制入內西頭供奉官江德源為內殿崇班左侍禁閤門祇候劉永崇為東頭供奉官右侍禁閤門祇候知澧州史方為西頭供奉官辰澧鼎州都巡檢使右班殿直閤門祇候康八元為右侍禁以討捕溪蠻有功其使臣將校第勞遷補有差召德源八元赴闕以守元為辰澧鼎州都巡檢使絳知鳳州永崇知施州方知辰

州康八元未見

太常博士張及言災傷州軍望權罷造閏

年長卷版籍俟後閏仍舊從之

丙子富州刺史向通漢率所部九十二人來朝貢名馬

丹砂銀裝劍兜鍪彩牌等物詔賜襲衣金帶鞍勒馬并
其子光澤以下冠服器幣有差通漢求日奉朝請詔許

五日一起居

己卯御史中丞尚書右丞兼宗正卿贈吏部尚書謚文

定趙安仁卒

庚辰京東轉運使請益兵防護兗州德源縣文宣王廟從之

丙戌河陽三城節度使張昊言近聞西京訛言有物如帽蓋夜飛入人家又變為犬狼狀微能傷人民頗驚恐每夕皆重閉深處以至持兵器捕逐詔使體量又命侍御史呂言馳往按本府長吏洎轉運提點刑獄司不即

上聞之故仍設祭醮禳禱

呂言造父夏卿祖

丁亥以暑熱賜輔臣花素布人十匹翰林學士李維

罷為戶部侍郎集賢院學士初維三兄皆年五十八而卒及是維亦得疾因力辭近職云維疾稍間命知許州

集賢院學士出藩自維始

春明退朝錄

六月壬辰朔詔三班使臣經汾陰改官後七年者並許考課遷陟禁陝西民鬻漆於北界

乙未以宣徽北院使同知樞密院事曹利用知院事

詔獎涇原駐泊都監周文質以其築南使城及緣山壕塹功畢也仍賜名曰靜邊鎮

丁酉以太常博士提點開封府界公事齊革監安州稅
革擅令尉氏縣毀撤坊市民舍當暑擾動故及於責

己亥詔諸州文學參軍長史別駕等降謫經十年者聽
還鄉

壬寅富州刺史向通漢以五州地圖來上乞留京師上
嘉其意甲辰授通漢本州防禦使還疆土署其兄子光
澤等三班職名通漢再表留京師不允乃為光澤等求
內地監當及言歲賜衣裘願使者至本任並從之通漢

本青州人唐僖宗時隔在溪洞因母疾不如童迨今三十年語言與中華無異云

乙巳入內供奉官趙用和言太廟每有享祀行事官並前一日入廟致齋望自今每月朔望祭官闈令亦前一日致齋從之是夕京師民訛言帽妖至自西京入民家食人相傳恐駭聚族環坐達旦叫譟軍營中尤甚上慮因緣為姦詔立賞格募人告為妖者既而得僧天賞衛士耿棨張山岡等令起居舍人呂夷簡入內押班周

懷政鞠之坐嘗為邪法並棄市其連坐配流者數人然
訛言實無其狀時自京師以南皆重閉深處知應天府
王曾今夜開里門敢倡言者即捕之妖亦不興

辛亥有彗出北斗魁第二星東北長三尺許向北行經
天牢拂文昌長三丈餘歷紫微三台軒轅連行而西至
七星凡三十七日沒

己未加號真武將軍曰真武靈應真君 知秦州李及
言得回鶻九部族軍王納丹等狀以曹瑋得假還京望

今且在本任詔獎璋仍從其請

初皇后父通嘗掌禁旅從潘美征廣南又累戰北面積勞至虎捷都指揮使領嘉州刺史太平興國中護蹕太原卒于師權寔京城西累贈永興節度使兼中書令母龐氏贈徐國太夫人是月始葬通及龐氏詔贈通太師尚書令謚武懿命昇王府諮議參軍張士遜具鹵簿鼓吹護葬祥符之鄧公原皇后親臨遣奠上御製祭文置靈坐之右

秋七月丁卯三司借內藏錢五十萬貫

辛未徙知陳州馮拯知河南府兼西京留守司事代王
嗣宗以嗣宗知陝州時帽妖興自西京嗣宗不得察故
也

壬申以星文示變赦天下流以下罪死罪減一等十惡
致死故殺劫殺謀殺人官典枉法賊至死造妖惑衆者
論如律在降官羈管十年以上者放還京朝官丁憂移
任七年未改秩者以聞 詔自今鑠廳應舉人所在長

吏先考藝業合格即聽取解如至禮部不及格當停見任其前後考試官舉送長吏並重寘其罪

甲戌以樞密直學士刑部侍郎李士衡為三司使代馬元方也士衡以足疾表求門謝許之上作寬財利論賜士衡又出內藏錢二百萬貫以助經費士衡因請刻聖製于本廳從之士衡方進用王欽若害之欲言而未有路會上論時文之弊欽若因言路振文人也然不識體上曰何也曰士衡父誅死而振為贈告乃曰世有顯人

上領之士衡以故不大用

欽若沮士衡據蘇軾雜記附見路振卒於祥符七年十月

去年九月李迪中對東門云云可參考

丙子浚汴口

己卯詔諸州帳籍自今簡停軍士每歲一造營房半歲一造職員馬遞鋪馬數每季一造時上封者言其繁冗紙墨所費或至掇斂故也

癸未右正言劉昞言近者詔捕妖人許陳告酬賞亦慮所告之人妄覲重賞誣執平民按問之際願令詳審上

曰比令糾告造妖者及呂夷簡推劾屢戒其審察無使枉濫果多不實即詔今日已前犯者更不問罪

丁亥謁玉清昭應宮幸開寶寺靈感塔是夕慧沒輔臣奉表稱賀

八月庚寅朔謁景靈宮遂幸上清宮祥源觀會靈觀

辛卯免青州原河口乾度課錢三陵副使郝昭信等請於永安縣建營徙軍士二指揮就糧從之

乙未判三司都催欠憑由司左正言集賢校理宋綬言

本司屢經恩赦除欠負差官詳定內有事節未圖者
凡六十八州軍共六百七十三萬貫石斤兩計三千二
百餘人至今報應未備望令轉運司選官與長吏催欠
官詳酌如合蠲免限半月聞奏從之於是皆獲蠲免焉

皆獲蠲免
據綬本傳

丙申對輔臣于龍圖閣

丁酉羣臣上表請立皇太子不允表三上許之先是知
梧州衛尉寺丞陳執中上復古要道三篇上異而召之

上時已屬疾春秋高大臣莫敢言建儲者執中既至進演要三篇以蚤定天下根本為說翌日上以他疏示輔臣皆贊曰善上指其袖中曰更有善此者出之即演要也因召對便殿勞問久之尋擢為右正言執中怒之子

也

實錄云執中得見于崇政殿其日甲寅在立太子後

是日據本傳則執中既見逾月乃立太子不知孰

是以事理推之本傳當得其實蓋羣臣因執中言始有建儲議見于崇政恐非所對也今從本傳執中附傳與

正傳載所上演要亦小不同今從正傳疑正傳考據必詳審爾

辛丑詔流內銓選人有累犯罪因衝替而獻文求試者

不得進內

壬寅新城內權都巡檢周仁美言地分巡檢軍士捕亡卒盜賊不獲皆有罰而獲者無賞今請獲亡卒一人賞

錢二百賊一人錢五百從之

仁美深州人

辰澧鼎州都巡

檢使張綸言下溪州刺史彭儒猛納先所略人口器甲等乞修貢如故詔賜儒猛錦袍銀帶令辰州通判劉中象召至明灘與歃血為誓遣之

癸卯詔前歲上聖號冊寶所賜脯今秋豐稔可追行之

甲辰立昇王受益為皇太子改名禎大赦天下惟十惡
劫殺謀殺故殺鬪殺盜官物偽造符印官典犯賊論如
律宗室並加恩文武常參官子為父後見任官者賜勲
一轉

乙巳以翰林學士晁迥為冊立皇太子禮儀使命祕書
監楊億撰皇太子冊文知制誥盛度書冊陳堯咨書寶
丁未內出鄭景岫四時攝生論陳堯叟所集方一卷示
輔臣上作序命刊板模印付閣門賜授任廣南臣僚仍

分給諸道州軍

戊申黎州山後兩林百蠻都王李阿善遣將軍卑熱等
百五十人來貢

己酉免潁濮二州浮客乾食鹽錢

庚戌以右諫議大夫知開封府樂黃目為給事中兼太
子左庶子昇王府諮議參軍吏部郎中直昭文館張士
遜為右諫議大夫兼右庶子禮部郎中直史館崔遵度
為吏部郎中直史館兼左諭德記室參軍左正言直史

館晏殊兼舍人賜金紫右正言魯宗道為戶部員外郎
兼右諭德賜緋魚玉清昭應宮資善堂都監左藏庫使
長州刺史入內押班周懷正為左驤驥使入內副都知
兼管勾左右春坊事

壬子彭王元儼加太傅為永清橫海節度使進封通王
以參知政事李迪兼太子賓客上初欲授迪太子太
傅迪辭以太宗時未嘗立保傅乃止兼賓客而詔皇太
子禮賓客如師傅有殿侍張迪者春坊祇候太子不欲

其名與賓客同改名克一迪奏其事上喜以告輔臣
以賀州團練使錢惟灝知和州惟灝占謝自陳和州去
京太遠改命知漣水軍惟灝倣之子也 詔中書門下
五品尚書省御史臺四品諸司三品見皇太子並答拜
自餘受拜

癸丑上作元良歲賜皇太子又作詩分賜賓客而下

甲寅楚王元佐加興元牧其雍州牧如故兼州府兩牧
自元佐始徐國長公主進封福國邠國長公主進封建

國宿國長公主進封鄂國

乙卯給事中兼太子左庶子樂黃目責授左諫議大夫
知荆南府西京左藏庫使會州刺史入內副都知張繼
能責授西京作坊使罷禁職為邠寧環慶路鈐轄開封
府判官虞部員外郎李直方監漣水軍稅推官監察御
史張及監高郵軍稅先是繼能主往來國信有國信司
吏陳誠者頗巧黠繼能欲援置羣牧司而誠先隸羣牧
坐事停職至是羣牧吏左宗挾其宿負白制置使曹利

用故誠不遂所求繼能怒宗之沮已密遣親事卒偵宗
會宗弟元喪妻宗嘗為假教駿軍校馬送葬及還元抵
飲肆與酒保相毆繫府中而假馬事未發誠即白繼能
請屬府并劾之黃目時知府受繼能屬獄未具為羣牧
副使楊崇勲所發故黃目等並坐責繼能自陳不願外
任得掌瑞聖園

庚申殿中丞史瑩言准詔詣鄭州界經度畎索水入金
水河止有役卒七千望發鄭州丁夫可一月功畢詔以

軍士萬人給之無得擾民仍令右領軍衛大將軍梧州團練使魏榮為都大部署御史忠佐馬軍副都頭張榮副之

辛酉詔皇太子月給錢二千貫 禮儀院言至道中敕百官於皇太子稱名宮僚稱臣續准敕依皇太子所請宮僚止稱名詔如至道之制

知祁州供備庫副使高志寧請詣闕言邊事許之九月

壬戌對於承明殿

韓琦墓誌云志寧自祁州請覲及對密奏今上德業日新宜早建東宮真

宗大寤面賜黃金五十兩還所治仍詔志寧凡所奏事許附入內侍省通進無闕銀臺司按志寧對承明日東宮已建矣今不取

甲子右諫議大夫兼太子左庶子張士遜等言臣等日詣資善堂參見皇太子猶令升階列拜然始跪受望令坐受參見不許

乙丑占城國王尸哩排摩牒遣使羅皮帝加等以方物來貢羅皮帝加言國人詣廣州或風漂船至石堂則累歲不達矣明年使還賜其王銀四千七百兩并戎器鞍馬

會要云四萬七千兩今從本傳

蔡州團練使德雍等請皇太子受拜

不許

丁卯御天安殿冊皇太子

庚午詔舊制賜諸軍物外戍者減半今聽全給 流內

銓言自今注軍監判官請不兼通判常從不給軍士從之

辛未令河南府葺王屋山陽臺觀給官田為常住時女道士王道真住是觀得玉壁于山中因請增葺故也

壬申皇太子謁玉清昭應宮景靈宮癸酉謁太廟 龍

圖閣待制李虛已上奉詔編羣臣所和御製詩為明良
集五百卷詔賜銀帛 三司假內藏銀十萬兩

丁丑詔三班使臣部送益州綱運至荆南無遺闕者自
今每運賜錢十五千三司軍大將十千

戊寅監察御史劉平請對于承明殿

庚辰御正陽門觀酺自是凡五日 上作稼穡倍登詩

歌器戒酒二諭示輔臣 詔京城諸司當竇土地者不得

用十月七日以是日日本太宗誕辰故也 河中府同耀

州民飢多流亡遣度支判官侍御史周實馳驛存撫之
壬午慶雲見于正陽門樓上 右正言劉暉言今歲秋
賦食祿之家鑠廳應舉者頗衆望諭中外自今食祿家
弟姪子孫若文藝必可程試者不得就資蔭其有官者
不得與孤寒競進詔不許但令諸州精加考較

甲申起居舍人呂夷簡為契丹國主生辰使供奉官閻
門祇候曹琮副之工部郎中直史館陳堯佐為正旦使

侍禁閣門祇候張君平副之琮彬幼子君平濫陽人君
平管勾汴口嘗建言歲開汴口當審擇其地則水湍駛
而無留沙歲可省疏浚工百餘萬詔用其策雖役不歲
興然其後浸有淤塞之患又請沿河縣令佐使臣能植
榆柳至萬株者書歷為課汴中溺死無主名者敕所在
收瘞悉施行之
種榆柳書歷為課會要在天禧元年三月今從本傳并書于此
祥源
觀成觀宇凡六百一十三區以監修內臣東染院使鄧
守恩為崇儀使

是月京東路饒韶巴昌州荆門保安軍並言豐稔

冬十月壬辰詔自今遣使檢逃戶災傷令三司以奏帳
式付之 開封府發解官任布等請依南省例謄錄進
士試卷及進士試題御筆點定詔試題進入餘不許
乙未雪上作瑞雪詩賜輔臣

庚子詔近臣觀玉宸殿刈小香占城稻遂於安福殿賜宴賦詩
壬寅召知益州樞密直學士右諫議大夫王曙為給事
中兼太子賓客職如故

癸卯三司使李士衡等言准詔歲省文帳二分已上其在司主典亦合裁減詔令與三部衆官詳定具合留名目以聞既而取事簡人衆者出補三班

辛亥河北緣邊安撫副使張昭遠言保州等處所種榆柳多匿亡命軍士亦嘗殺害守卒又緣邊寨柵多種此樹久亦不便望加採伐從之

癸丑太常博士祕閣校理李垂請令江浙兩路放行茶貨左諫議大夫孫奭言茶法屢改非示信之道望遣官

重定經久之制即詔奭與三司詳定務從寬簡時言者愈多不過欲惠小商優園戶朝廷亦嘗差優其直饒其給大抵吝茶之出而須錢實京師故法不能變言者但采浮論而不切於事理未幾奭出知河陽事遂止奭初自密州代還時方置天慶等節天下設齋醮張燕費廣奭又請裁省浮用不報奭復出其居朝廷蓋不周歲云

十一月十九日奭出知河陽今并書

樞密直學士王曙言自今轉運使

副使提點刑獄朝臣使臣舉官望不許預先移牒報知

免立私恩庶臻公道詔令別行條約

會要十月事

十一月己未翰林學士晁迥為承旨時朝廷數舉大禮詔令每下多出迴手嘗夜召對上令內侍持御前炬燭送歸院他日曲宴宜聖殿內出牡丹百餘盤千葉者惟十餘蒂以賜宰臣親王上顧迥與學士錢惟演亦皆賜焉

壬戌詔諸州職田先以三月四月九月內到任為限過其月有閏者勿理

己巳三司言陝西入中芻糧請依河北例每斛束量增
直計實錢給抄入京以見錢買之如願受茶實交引即
依實錢數給之令權貨務並依時價納緡錢支茶不得
更用芻糧交抄貼給茶貨詔每入百千增五千茶與之
餘從其請

辛未召近臣觀太清樓書太宗墨蹟及御製遂賜宴上
作詩從官畢和

壬申斬威武軍副使都頭王成逵建坐訛言惑衆也

建逵

當檢
進字

甲戌命翰林學士錢惟演盛度樞密直學士王曙龍圖閣待制李虛已李行簡於祕閣再考定開封府得解舉人試卷令祕閣校理王準封彌定為三等具名以聞乃

詔從上解百五十人準質子也

封彌此非事始書此為任布等得罪張本

乙亥上作冬至宴親賢詩又出御製三教詩各百首歌論九首示宰相起居舍人呂夷簡言澶魏豐熟望出內藏錢二十萬貫市芻積糧從之

辛巳迎道釋經赴三宮觀及都城寺院先是上令選藏教中精妙者凡五十八卷讎校摹印至是而畢

癸未上作後苑宴宗親詩賜皇太子通王 祕書丞朱

正臣上言前通判廣州竊見蕃商多往交州貿易市齎到黎字及砂蠟錢至州頗紊中國之法望自今犯者決配牢城隨行貨盡沒入官詔廣南轉運使洎廣州覆議既而上言本州海路與交州占城相接蕃商乘舟多為海風所漂因至外國本非故往貿易欲望自今齎到黎字

砂鑷等錢並沒入官其餘博易所得布帛取三分之一
餘悉還之所犯人以違制失論詔可

丙戌契丹遣使右衛上將軍耶律留寧副使翰林學士
起居舍人知制誥吳叔達來賀承天節

丁亥命翰林學士承旨晁迥知制誥陳堯咨於秘閣再
考國子監及太常寺別試進士文卷上其名詔國子監
從上解二十人太常寺六人開封府國子監太常寺發
解官皆坐薦舉不實責監諸州酒稅屯田員外郎判度

支勾院任布鄧州著作郎直集賢院徐奭洪州太子中
允直集賢院麻溫其池州度支判官太子中允直集賢
院楊侃汝州太子中允直集賢院丁度齊州太常少卿
直史館張復罰銅十斤初作祥源觀布論之既忤宰相
及考試開封而奭潛發封卷視之遂與奭等俱責度祥
符人也

十二月己丑朔免涇原折變芻藁以穀不登也

甲午詔如聞邠寧涇原州流民多往秦隴州故關山及

渭州山外鎮戎軍以來逐熟慮無知者誘略人口鬻於蕃界宜令所在州縣洎巡檢使臣察舉之

丁酉周實言同耀邠寧涇原渭華號隴州及河中府永

樂虞鄉二縣旱歉望權格稅物仍罷和糴從之

實九月出使

詔文武官自今承天節除子孫外自餘宗屬及已食祿者不得奏薦

辛丑以河陽三城節度使張旻為武寧節度使同平章事旻遭喪有詔起復於是自河陽來朝特加寵命尋出

判陳州

工部侍郎叅知政事張知白與宰相王欽若議論多相失因稱疾辭位丙午罷為刑部侍郎翰林侍讀學士知

天雄軍上賦詩餞之輔臣以雜學士出藩并翰林侍讀

學士外使皆自知白始

宋敏求春明退朝錄云祖宗時宰相罷免唯趙令得使相餘多

本官歸班叅樞亦然天禧中張文節始以侍讀學士知南京天聖中王文康以資政殿學士知陝州自慶歷後解罷率皆得職焉將作監丞蔡齊為著作郎直集賢院故事

第一人及第到任一年即召試齊自兗州通判徙濰州

獻所為文乃得召試

此據江休復
雜誌當考

癸丑契丹遣使左林牙工部尚書蕭留寧副使右諫議

大夫馮貽謀來賀明年正旦

甲寅詔文武官曾使契丹及接伴者自今戎使到闕除
兩省給舍外並令於左掖門出入

丙辰賜宣州學究徐晝出身晝上涇縣茶場利便歲增
課千萬故也 禮儀院言儀制圖內言閤門通事舍人

者今欲止名通事舍人從之

咸平四年七月
焦守節事當考

欽定四庫全書

史部

續資治通鑑長編卷九十三至五

詳校官檢討_臣劉錫五

刑部郎中_臣許兆椿覆勘

纂修官檢討_臣張家駒

謄錄貢生_臣王兆泰

欽定四庫全書

續資治通鑑長編卷九十三

宋 李燾 撰

真宗

天禧三年春正月甲子三司假內藏紬萬五千疋

丁卯翰林學士錢惟演等四人權同知貢舉 賜秦州
永寧寨蕃僧策凌班珠爾伊朗頗幹二人紫衣以部署官
瑋言其屢經指使故也

乙亥諸路貢舉人郭稹等四千三百人見于崇政殿時
稹冒總喪赴舉為同輩所訟上命典謁詰之稹引咎付
御史臺劾問殿三舉同保人並贖金殿一舉時有司欲
脫宋城王洙問洙曰果保稹否不然可易也洙曰保之

不願易也遂與稹俱罷

王洙本傳云稹冒祖母禪墓銘云從母禪今從實錄郭稹有傳

祥符人恐此別是一人也

京西轉運使胡則言滑州進士楊世質

等詐本州黥落即取元試卷付許州通判崔立看詳立
以為世質等所試不至紕繆已牒滑州依例解發詔轉

運司具析不先奏裁直令解發緣由以聞其試卷仰本
州繳進世質等仍未得解發及取到試卷詔貢院定奪
乃言詞理低次不合充薦詔落世質等而劾轉運使及
崔立之罪立馭陵人也初為果州團練推官役兵輦官
物他州道險率衆錢傭舟載歸知州姜從革論如率斂
法三人當斬立曰此非以私已罪止杖爾從革初不聽
論奏詔如立議上記其名代還特轉大理寺丞大中祥
符間天子既封禪士大夫爭奏符瑞獻贊頌立獨言水

發徐兗旱連江淮無為烈風金陵大火是天所以戒驕
矜而中外多上雲露草木禽蟲諸物之瑞此何足為治
道言哉願敕有司草木之異雖大不錄水旱之變雖小
必聞前後凡上四十餘事云

或將後段附祥符二年正月張知白俞獻可所言時

後事

己卯詔自今罪人當令衆在冬月者免之

丙戌知江寧府丁謂言啟承天節道場甘露降仍獻五
言詩有詔褒答又和詩賜焉

是月三司言使臣傳宣取物承前止是口傳詔旨別無
憑由致因緣盜取錢物今請下入內侍省置傳宣合
同司專差內臣一員主之如有所須索即以合同憑由
一本給付逐庫務給訖繳申三司三司置御寶憑由司
擇人吏專主除破所貴絕於欺弊從之

此據會要又王
皞百一編置御

寶憑由司緣王欽若注在
祥符元年二月當考詳

禁川峽走馬承受使臣自

今往來興販物色

二月甲午詔沙門寨監押不得挾私怨害流人委提點

五島使臣常察舉之違者具事以聞重寘其罪先是著作佐郎高濤襄州文學焦邕皆以罪配隸監押董遇因事殺之至是清子伐登聞鼓上言遇責賂不足誣以謀叛詔詰遇而清既死無以證辨故有是命

乙未禁採捕山鷗

丁酉總管爾嘉勒斯齊克遵遣僧景遵等來貢

己亥辰州言富州防禦使五溪都防禦使向通漢卒詔賜緡帛羊酒命其子光舜知富州事光舜尋卒改命其

次子光憲襲焉

壬寅知越州刑部郎中直昭文館高紳上言臣訪聞當
州僧尼既受戒還家即受父母拜禮臣責問僧司具言
有實伏以為臣為子忠孝之道居先在家出家怙恃之
情匪異苟乖斯道是曰亂倫且子於父母恩報皆一在
儒書則曰昊天罔極在釋教則曰恩重莫報安可用小
加大使卑逾尊益由甌越之民僧俗相半溺於信奉罔
序尊卑竊見唐太宗貞觀五年嘗禁僧尼受父母拜禮方

今鴻化風行革除澆弊望降敕命特行戒止詔尚書祠部嚴加禁絕違者重決罰之

丙午河南府言地震

丁未出皇太子所書御詩賜宰相上作學書歌賜皇太子

丙辰又作勸學吟賜之 宰相王欽若上會靈志百卷
上製序名五岳廣聞記

三月戊午朔日有食之內出聖祖降臨內記示宰相

知澧州曹克己言本州石洞寨深在蠻界不當要路所
控扼屯集人馬虛費芻糧莫令毀拆留卒五人守護有
警馳報靈溪寨從之

先是亳州民訛言兵起老幼千餘人夜奔陳州已而自
還卒酉判陳州張旻以聞命監察御史章頻乘傳察視
仍往襄鄧州安撫陝西流民尋又命起居舍人呂夷簡
至亳州體量民各安堵如故乃歸京西轉運使提點刑
獄官並坐不察部內虛警徙廣西福建夔州等路涇

州言知州連州刺史李繼昌暴中風眩上亟遣使挾醫
往視又取寶丹封賜之仍許肩輿還京師未至而卒又
遣中卒護其喪歸錄其子官繼昌性謹厚所至以寬柔
為治衆頗懷之任峽路日與上官正聯事正嚴忍好殺
嘗有縣胥護芻糧地遠後時而至正令曳出斬之繼昌
徐為慰解卒貸焉駙馬都尉遵最初聞繼昌病即馳省
不俟命上遣使令乘驛赴之既還上表自劾上使輔臣
慰諭焉

壬戌詔南省下第舉人內曾經御試及諸科七舉終場者特以名聞

乙丑三司假內藏庫銀一十三萬 增許州公用錢至七十萬從知州李維之請也

丙寅上御崇政殿親試禮部奏名貢舉人作詩賜考校官令皇子書示宰相得進士王整以下六十三人賜及第八十六人同出身又賜學究出身者一十三人諸科及第者一百二人同出身者四十七人試將作監主簿

者五人除官如前例

王整魏人登科記云明道元年十月庚子錄王旦孫整為正字恐此

及第者非魏人或是贄子

趙德明來告其繼立母卒遣使弔祭起

復悉如景德之制

詔禮賓院自今不得以外國人充

通事時有開封府民訟通事辛榮本夏州子弟投禮賓院

充小蕃通事虛稱在京人府移禮賓院稱無條約詔以

榮累經赦宥免杖黥面配海州本城因有是詔

此詔附見會要

乃此月事不得其日也

辛未補饒州公士楊亮為三班借職轉運使言亮捕强

賊百餘人故也

亮已見祥符六年

壬申慶州言柔遠蕃寇入境巡檢楊承吉與戰不利官軍殺傷頗衆上曰德明素受朝命何忽爾侵擾豈邊將失於撫綏耶即命客省使康州防禦使曹瑋為華州觀察使鄜延路副都部署環慶秦州緣邊巡檢安撫使鄆伽恭邁德密等族聞瑋至歸附者千餘落

鄆伽族歸附在八月癸卯

恭邁德密族歸附在九月丙寅今并書

翰林學士承旨晁迥以老疾求

解近職詔不許特蠲其宿直令三日五日一至院迥辭

以非故事乃聽俟秋還直

己卯工部郎中陳堯佐右正言陳執中並奪一官堯佐
為起居郎依前直史館監鄂州茶場執中衛尉寺丞監
岳州酒稅初上累定考試條制舉人納試卷即先付編
排官去其卷首鄉貫狀以字號第之封彌官謄寫校勘
始付考官再定等訖復封彌送覆考官再定等乃送詳
定官啟封閱其同異參驗著定始付編排官取鄉貫狀
字號合之即第其姓名差次并試卷以聞遂臨軒放榜

馬大抵欲考校詳定官不獲見舉人姓名書翰編排官雖見姓名而不復升降用絕情弊而堯佐執中為編排官不詳此制復改易其差級翌日內廷覆驗多所同異遂悉付中書命直龍圖閣馮元太子右諭德魯宗道閱視仍召堯佐執中洎考校詳定官對辨之堯佐等具伏王欽若等言堯佐等所犯誠合嚴譴若屬吏議其責尤重請止據罪降黜從之而宗道又請以堯佐等妄去留者明諭貢舉人乃詔禮部揭榜貢院其元定合格為編

排誤落者並賜附榜及第元定不合格誤編排及第者
並追敕更令修學元定稍及第者量免省試凡已落復
及第者進士諸科各二人免省試者進士十四人諸科

二十三人已及第出身而追奪者二十一人

本志云先是編排官

兼詳定仍許點檢差失是歲分編排詳定為二而堯佐
執中不詳詔意得詳定試卷復更升降放及第畢禁中
參驗多所同異故堯佐執中坐點責與實錄所載差別
今且從實錄當考王舉正誌堯佐墓云編次文卷有差
舛宰相王欽若持其事降秩左
史司茗推于鄂渚未至丁內艱

癸未翰林學士錢惟演樞密直學士王曙工部侍郎楊

億知制誥李諮直史館陳從易並降一官進士陳損黃
異等五人並決杖配隸諸州其連狀人並殿一舉初損
異等率衆伐登聞鼓詐惟演等考校不公命龍圖閣直
學士陳堯咨左諫議大夫朱巽起居舍人呂夷簡於尚
書省召損異等令具析所陳事及閱視試卷以聞堯咨
等言惟演等貢院所送進士內五人大理稍次從易別
頭所送進士內三人大理荒繆自餘合格而損異等所
訟有虛妄故并責焉

甲申屯田員外郎張宗誨言諸州取年滿里正為牙職主掌官物多致破蕩家業請罷之令募明書計人充職詔付三司

乙酉徙判陳州武寧節度使同平章事張昊判襄州時石隕于潁占者以為災逮鄰守特徙昊避之尋命歸本鎮入內副都知周懷政日侍內庭權任尤盛附會者頗衆往往言事獲從同輩位望居右者必排抑之中外帑庫皆專取而多入其家性識凡近酷信妖妄有朱能

者本單州團練使田敏家廝養性凶狡遂賂其親信得
見因與親事卒姚弋弼等妄談神怪事以誘之懷政大惑
援引能至御藥使領階州刺史俄於終南山修道觀與
殿直劉益輩造符命託神靈言國家休咎或臧否大臣
時寇準鎮永興能為巡檢賴準舊望欲實其事準性剛
強好勝喜其附己故多依違之是月準奏天書降乾祐
山中蓋能所為也中外咸識其詐上獨不疑劉敏作寇
準傳云朱
能獻天書上以問王旦旦曰始不信天書者寇準也今
天書降準所當令準上之則百姓將大服乃使周懷政

諭準準始不肯而準媚王曙居中與懷政善曙固要準準乃從之按王旦死於天禧元年正月而準上天書乃三年三月放誤甚矣或欽若實為此非旦也

夏四月辛卯備儀仗至瓊林苑迎導天書入內太子右諭德魯宗道上疏略曰天道福善禍淫不言示化人君政得其理則作福以報之失其道則出異以戒之又何有書哉臣恐奸臣肆其誕妄以惑聖聽也 知河陽孫奭上疏言朱能者奸憊小人偶塵驅使驟為牧伯皆由妄言祥瑞而陛下崇信之屈至尊以迎拜歸祕殿以奉

安上自朝廷下及閭巷靡不痛心疾首反脣腹誹無敢
言者漢大成將軍以帛書飯牛揚言牛腹中有奇書殺
視得書天子識其手迹又有五利將軍妄言方多不售
二人皆坐誅先帝時有侯莫陳利用以方術暴得寵用
一旦發其姦誅於鄭州漢武可謂雄材先帝可謂英斷
唐明皇得靈寶符上清護國經寶券皆王鉞田同秀等
所為明皇不能顯戮怵於邪說自謂德實動天神必福
我夫老君聖人也儻實降語固宜不妄而唐自安史亂

離乘輿播越兩都盪覆四海沸騰豈天下太平乎明皇
雖僅得歸闕復為李輔國劫遷卒以餒終豈聖壽無疆
長生久視乎夫以明皇之英睿而禍患猥至曾不知者
良由在位既久驕亢成性謂人莫己若謂諫不足聽心
玩居常之安耳熟導諛之說內惑寵嬖外任姦回曲奉
鬼神過崇妖妄今日見老君於閣上明日見老君於山
中大臣尸祿以將迎端坐畏威而緘默既惑左道即紊
政經民心用離變起倉卒當是之時老君寧肯禦兵寶

符安能排難邪今朱能所為或類於此願陛下思漢武之雄材法先帝之英斷鑒明皇之召亂庶幾災害不生禍亂不作爽又言天且無言安得有書天下皆知朱能所為獨陛下一人不知爾乞斬朱能以謝天下上雖不

聽然亦不罪爽也

爽本傳載天且無言安得有書之對在祥符初恐誤也移見祀汾陰前又

見于此朱能所獻天書其迎奉之禮蓋不減祥符而國史實錄諱之遂不復詳載且失其時日按稽古錄於是年三月載寇準奏天書降乾祐山中今用此為據繫之三月末魯宗道孫爽諫疏亦不得其時因此附見國老閑談以宗道所諫為指祥符則誤也今追正之記聞載爽諫語比之正傳尤切直恐爽不但一疏今並載之可

見先朝容直臣也按李維集有賀天書降而表其一云四月四日迎奉入內其二云八月二十四日迎奉入內今並用此月日載之長編

詔太子左庶子張士遜以下每遇皇太子侍車駕行幸許依內殿起居陪從

癸巳謁玉清昭應宮景靈宮因幸開寶寺甲午幸會靈觀上清宮祥源觀免廊延路鈴轄西上閣門使昭州團練使高繼勳仍削一任都監曹仁用監押胡從式並除名配潁虢州金州仁用等坐販易交引繼勳市馬虧直也龍圖閣直學士工部郎中陳堯咨嘗舉仁用責授

兵部員外郎職如故 河東轉運使李放貢錢三十萬
貫糧百二十萬石詔獎之

乙未幸啓聖院

丁酉知江寧府丁謂言中使雷允恭詣茅山投進金龍
玉簡設醮次七鶴翔于壇上上作詩賜謂

己亥召山南東道節度使同平章事判永興軍府寇準赴
闕 審刑院請令開封府自今有未明條格止移牒問
大理勿遣法曹參軍入寺如故事詔可

復遣入寺會要在四年九月今

并書

辛丑詔轉運使副提點刑獄館閣臺省官外任歲滿代還者並依京朝官例於審官院投狀考課 詔獎知保州內殿崇班盧鑑以其幹職也

壬寅召近臣詣真遊殿朝拜天書 上作玉宸殿觀瑞麥詩賜近臣

戊申禁金商等州祀邪神所犯頭首及強豪者並處死 壬子錄故右侍禁丁惟清子遵望為三班奉職惟清前

知西涼州陷蕃故也

五月丁巳朔大食國遣使來貢

己未龍神衛四廂都指揮使夏守恩為捧日天武四廂都指揮使依前泰州防禦使洛苑使勤州刺史同勾當皇城司劉美為龍神衛四廂都指揮使領昭州防禦使上不豫中宮預政以守恩領親兵倚用之故與美並命守恩尋遷殿前都虞候美遷馬軍都虞候守恩仍權領殿前步軍司美權領馬軍司事

守恩美等遷在七月壬申權領二司在八月丁

酉今并書之美本傳云先是美與周懷政聯事懷政姦恣人多畏憚美未嘗附懷政左右有過必痛繩之親從卒偵邏者多不時更易美按籍分番次均使焉上屢欲授美兵柄以皇后懇讓故中輟者數四於是卒用之此傳蓋當時修史官以

禮儀院言每歲端午百官休務

媚太后爾今不取

皇帝不御前殿惟中書樞密院奏事于承明殿今邊鄙寧靜刑訟稀簡無急速機務請令中書樞密院其日罷奏事為定式從之

壬戌詔自今管軍將校緣邊部署鈐轄犯賊私罪當禁錮者即以本司事付長吏訖禁勘時廊延鈐轄高繼勲

免官後始以本司事付知州因降是詔 左諫議大夫
知鄆州戚綸責授岳州團練副使先是有王遵誨者嘗
任西邊寓家水興閨門不肅事將發知府寇準為平之
及是遵誨為同提點刑獄官綸因諧戲語及準遵誨怒
以為斥已遂與提點刑獄官李仲容奏綸有訕上語故
坐責綸薦於古學善談名理喜言民政頗近迂闊事兄
維友愛甚厚維卒聞訃哀慟不食者數日交于故舊以
信義著士子謁見必詢所業訪其志尚隨才誘誨之嘗

云歸老後得十年在鄉間講習亦可以恢道濟世大中
祥符中繼修禮文之事綸悉參議與陳彭年並職屢召
對多建條式恩寵其盛樂於薦士每一奏十數人皆當
時知名者晚節為權倖所排遂不復振後二年卒家無
餘貲家人於几閣間得遺戒一篇大抵勸子弟為學

本傳

以遵誨為勸農副使此時
猶未改官名也今正之

庚午河北轉運使兵部員外郎寇瑛為工部郎中再留
一任河決澶淵城視役河上隄墊數里衆皆奔潰而瑛

獨留自若水為折去衆異之嘗言契丹約和以來河北減卒之半而復刺土兵其實益三分之一而塞下軍儲

不給請行入中鑿頭便糴三說之法

傳言河決澶淵後城始遷官恐誤也

按實錄明年正月辛未命高漢美監修澶州決河然不見初決時今且附見當考入中三說當考沈括云世傳算茶有三說法最便三說者皆謂見錢為一說犀牙香藥為一說茶為一說深不然也此乃三分法耳謂緣邊入納糧草其價折為三分一分支見錢一分折犀象雜貨一分折茶爾又有并折蓋為四分法更改不一皆非三說也予在三司求得三說舊按三說者乃是三事博糴為一說便糴為一說直便為一說其謂博糴者極邊糧草歲入欲足常額每歲自三司拋數下庫務先封椿見錢緊便錢緊茶抄緊便錢謂水路商旅所便處緊茶

抄謂上三山場推務然後名人入中便糴者次邊糧草商人先入中糧草乃詣京師筭請慢便錢慢茶抄及雜貨慢便錢謂道路貨易非便處慢茶抄謂下三山場推務直便者商人取便于緣邊入納見錢于京師請領三說先博糴數足然後聽便糴及直便以此商人競趨爭先赴極邊博糴故邊粟常先足不惟諸郡分裂糧草之價不能翔踊諸路稅課亦皆盈衍此良法也予在三司方欲講求會左遷不果建議

辛未上親錄繫囚多所原減

癸酉詔今年五月一日已前得替判司簿尉並放選

乙亥兵部員外郎龍圖閣待制李虛已為右諫議大夫充職右正言劉晔判三司戶部勾院賜緋魚虛已晔並

表求外任上以虛已儒雅循謹屢上封言事故加獎而

留之或云璚兼他職蓋執政者不欲其專任言責也

實錄

天聖元年四月丁巳稱執政畏忌言官乃優與職任而罷之蓋指此也似有所避忌今兩存之六月末范雍言

當考

辛巳監察御史劉平為鹽鐵判官章頻為度支判官並

賜緋魚御史於是復兼省職

劉平傳云平為御史數上疏論事為丁謂所忌久之

除鹽鐵判官按此年六月戊戌謂乃參政恐誤也元年二月丁丑詔別置諫官御史六員不兼他職今璚與平

類皆兼省職蓋非當日詔意也

河北緣邊安撫司言準詔規度雄州

雍城其地甚廣本州先有材木望今漸建屋宇冀行旅往來有所障蔽從之

甲申寇準自永興求朝準將發其門生有勸準者曰公若至河陽稱疾堅求外補此為上策儻入見即發乾祐天書詐妄之事尚可全平生正直之名斯為次也最下則再入中書為宰相爾準不懌揖而起君子謂準之卒及于禍蓋自取之也

此出湘山野錄其言有理故取之

詔廣南福建

路京朝幕職州縣官丁憂者委轉運使權差官替放離

任此據
本志

六月丙戌朔禮儀院言先準御札每月旬假及上巳春
秋二社端午重陽並休務一日內旬假皇帝前後殿不
坐餘日百官不入中書樞密院詣後殿起居又準近詔
端午前後殿不坐今參詳望凡遇上件休務日皇帝前
後殿不視事中書樞密院及諸司有急速公事須面奏
者特取進止從之 徐州言利國監大風起西南壞官
私廬舍二百餘區軍民壓死者十二人詔張旻安撫之

戊子保信軍節度使丁謂自江寧來朝召之也

辛卯太白晝見占曰女主昌先是江淮發運使賈宗

言諸路歲漕自真陽入淮汴歷堰者五糧載煩於剥卸

民力疲於牽挽官司艦舟由此速壞今議開揚州古河

繚城南接運渠毀龍舟新興茱萸三堰通漕路以均水

勢歲省官費數十萬功利甚厚詔屯田郎中梁楚閤門祇

候李居中按視以為當然於是役成水注新河與三堰

平漕船無阻公私大稱其便賜詔獎之宗復請御製文

許之會上仙不及成 初殿中侍御史王臻為淮南轉

運使發運司請浚漕渠虞諸堰臻言揚州北有名伯堰

謝安所作後人思之不敢廢請罷浚渠兼浚渠亦無所

益臻尋入三司為度支判官而發運司卒浚渠以通漕

坐前異議責監察御史知睦州責官不得其時今附此為度支乃今年正月已

勿臻責睦州道復官徙福州實錄亦不書

甲午左僕射平章事王欽若罷為太子太保時欽若恩
遇浸衰人有言其受金者欽若於上前自辨乞下御史

臺覆實上不悅曰國家置御史臺固欲為人辨虛實耳
欽若皇恐因求出藩會商州捕得道士譙文易畜禁書
能以術使六丁六甲神自言嘗出入欽若家得欽若所
遺詩及書上以問欽若欽若謝不省遂罷相制辭以均

勞之意從優禮云尋命判杭州

判杭州實錄無其日却於太子太保歸班下即

云尋命判杭州今從之實錄云初周懷政以上崇禋祀
遂與妖人朱能輩偽造靈命冀圖恩寵且日進藥餌欽
若屢言其妄復密陳規諫懷政懼得罪因并誣詆言捕
獲金商州道士譙文易畜禁書有神術欽若素識之上
不復辨詰故有是命此蓋當時史官見欽若復相故陰
為之辭其實不然也今削去受金覆實事據記聞載蘇

頌子容語此必
不妄今從之

乙未河決滑州城南

劉睦正傳云歲薦饑河決滑州大興力役道殍相望睦請策免宰相

以應天變按王欽若已先罷於是寇準未拜獨向敏中在位睦時實為諫官兼省職傳載其事於聖水前蓋顛倒也今附見睦遷知雜時李臺十朝綱要灌澶濮鄆濟至徐州入淮遣使救沒溺者卹賜其家

丁酉以引進使李允則為容省使依前高州團練使知

鎮州兼鎮定鈐轄允則在雄州十四年

自景德三年四月為安撫副使

九月乃知雄州至今凡十四年也二年正月嘗知雄州二月即改命何承矩而徙允則知瀛州司馬光記聞云允則在雄州十八年蓋誤也

河北既罷兵允則治城壘不輟遼主

問其相張儉曰聞南朝尚修城備得無違誓約儉曰李雄州為安撫使其人長者不足疑既而有以為言詔詰之允則奏曰初通好不即完治他日如有頽圯復安敢動因此廢守備臣恐遼人不可測也帝以為然城北舊有甕城允則欲合於大城為一先建東嶽祠出黃金百兩為供器導以鼓吹居人爭獻金銀久之密自撤去聲言盜自北至遂下令捕盜三移文北界乃興板築揚言以護祠而卒就關城浚壕起月隄自此甕城之人悉內

城中周世宗始以關為州而民多以草覆屋允則取材
木西山大為倉廩營舍始教民陶瓦甃標里閑置廊市
邸舍水碓城上悉累甃下環以溝塹時麻植榆柳廣閭
承翰所修屯田架橋引水作石梁築構亭榭列堤道以
通安肅廣信順安軍歲修禋事台界河戰棹為競渡縱
北人遊觀潛寓水戰州北舊設陷馬坑城上起樓為斥
候望十里自罷兵人莫敢登允則曰南北既講和矣安
用此為命徹樓夷坑為諸軍蔬圃浚井疏洫列畦龍築

短垣縱橫其中植以荊棘而其地益阻險因治坊巷徙浮圖北垣上州民旦夕登望三十里令安撫司所治境有隙地悉種榆久之榆滿塞下謂僚佐曰此步兵之地不利騎戰豈獨資屋材耶上元舊不燃燈允則結綵山聚優樂使民縱遊明日偵遼帥欲間入城中觀允則與同僚伺郊外果有紫衣北人至比夕與俱入傳舍不交一語出妓女羅侍左右劇飲而罷且置其所乘驢廐下使遁去即幽州統軍也後數日為遼所誅嘗燕軍中而

甲伏庫火允則作樂行酒不輟副使請救不答少頃火
熄命悉瘞所焚物密遣使特擻瀛州以茗籠運器甲不
浹旬兵數已完人無知者樞密院請劾不救火狀上曰
允則必有謂姑詰之對曰兵械所藏敵火甚嚴方燕而
燔必姦人所為舍燕救焚事或不測又得遼謀釋縛厚
遇之謀言燕京大王遣來因出所刺沿邊金穀兵馬之
數允則曰若所得謬矣呼主吏按籍書實數與之謀請
加緘印因厚賜以金縱還未幾謀遽至還所與數緘印

如故反出遼中兵馬材力地里委曲以為報一日民有
訴為遼人毆傷而遁者允則不治與傷者錢二千眾以
為怯逾月幽州以其事來詰答以無有蓋他諜欲以毆
人為質驗比得報以為妄乃殺諜雲翼卒亡入遼中允
則移文督還契丹報以不知所在允則曰在某所契丹
駭不敢隱即歸卒乃斬以徇後無敢亡者允則不事威
儀間或步出遇民可與語者延坐與語以是洞知人情
訟至無大小面訊立斷善撫士皆得其用盜發輒獲人

亦莫知其繇身無兼衣食無重羞不畜貨貨當時邊臣

鮮能及之者

邊臣無及允則者此據司馬光記閭今附見正傳所云身無兼衣食無重羞不畜貨貨

下允則事當散入諸年然日月多不可考今并書之或有與諸年所書相犯者當更檢詳也

戊戌以山南東道節度使同平章事冠準為中書侍郎

兼吏部尚書平章事保信節度使丁謂為吏部尚書參

知政事故事節度使除拜當降麻翰林學士盛度以為

參知政事當屬外制遂命知制誥宋綬草辭謂甚恨焉

度事據歐陽修歸田錄

謂在中書事進謹甚嘗會食羹汚準鬚

謂起徐拂之準笑曰參政國之大臣乃為官長拂鬚耶
謂甚愧之由是傾誣始萌矣

辛丑詔自今略賣人口入契丹界者首領並處死誘致
者同罪未過界者決配淮南州軍牢城 先是河決滑
州城西北天臺山傍俄復潰於城西南岸摧七百步侵
益州城民多漂沒歷澶濮鄆濟注梁山泊又合清水古
汴河東入于淮州邑被患者三十二於是遣中使捄溺
者賜其家緡錢近臣祭決河御史劾官吏之罪命馬步

軍都軍頭興州刺史崔鑾領宣武卒四百人巡護又命
光祿卿薛顏西上閤門使張昭遠乘傳與京東河北轉
運使計度以聞

癸卯命虢州團練使郝榮為滑州修河部署供奉官閤
門祇候薛貽為都監

丁未以同王清昭應宮副使吏部侍郎林特為尚書左
丞王清昭應宮副使特性邪險善附會故丁謂始終善
特亟引用之

戊申召宗室近臣館閣三司諫官御史法官京府官詣
真遊殿觀道像各賜聖祖降臨記一函

己酉徙邠寧環慶路部署司于慶州是司先在邠州曹
瑋言其去邊稍遠故也 詔審官院應轉運使副提點

刑獄內外帶職兩省臺官并京朝官等轉官及三年已
上者如在外仰逐處收接歷任文狀附遞送審官院磨
勘進呈內有得替到闕及在京見勾當者亦磨勘引見
如在京三年已經磨勘改轉或尚且依舊勾當者即直

候得替吏及三年以上再合磨勘依例施行其内外有未磨勘間便遇朝廷差使者如合該磨勘即先次磨勘如昨已經勘會轉官及七年曾具申奏并因公事降差

遣移任無例磨勘者不在此限

會要天禧三年六月二十四日事實錄無之今

附本日
已酉

審官院言準詔磨勘内外臣僚合具申請在

京勾當臣僚已經磨勘轉官仍舊勾當即候得替吏及三年再合磨勘者參詳如見勾當未罷者即準前詔直候得替磨勘如朝廷特留一任或量留年限者欲望每

及三年亦與磨勘又京朝官轉官雖及三周年曾經磨勘引見及奏名并該七年申奏者雖不轉官欲望自磨勘後重叙三年方得磨勘如未經取旨特旨別令磨勘者不在此限又勾當事京朝官自降敕以前差遣者即準前詔一例磨勘降敕後方就差遣其間多有改官已及三周年者參詳未勾當事以前雖不該磨勘乞朝廷相度如勾當後及一年或二年別無遺闕即許將前來年限通理亦與磨勘詔臣僚磨勘歷任文字仰本院并

將自前已磨勘歷任功過一處開拆進呈降敕後就差遣者改官已及五年勾當事及一年并改官及三年勾

當事及二年者並特與磨勘餘悉依奏

會要天禧三年七月事今附見

六月二十四日後頒刪修乃可天聖三年九月六日方改此詔

甲寅長清郡主卒秦悼王之長女也適莊宅使田守信

有司言小功服禮當降殺上特臨奠廢朝先天節羣臣

上壽不舉樂錄其二子並遷秩

重進子已見淳化四年

是月屯田員外郎判三司開拆司范雍言自今諫官御

史兼它職者望令仍舊舉職及乞增置諫官上令別選

人充諫官御史

此據會要當考諫官御史兼它職者姓名五月乙亥辛巳

詔選強

明朝臣知雲安軍勿差班行從轉運使刁湛所請也

欽定四庫全書

續資治通鑑長編卷九十四

宋 李燾 撰

真宗

天禧三年秋七月戊午崇儀副使史瑩責授供備庫副
使坐所治惠民河隄決壞民廬舍故也

本志作崇儀使當考

詔

河東路不許攜家赴任州軍有官員挈屬在彼者並令
發遣離任

辛酉知河南府馮拯言父老僧道舉人等列狀願赴闕
請車駕封中嶽上曰茲事體大未可輕議令拯慰遣之
詔河北州軍民有越北界市糧及不係禁物為北界所
捕送者並決杖一百釋之 三司假內藏錢五十萬貫
絹十萬匹 學士院言準詔大理評事胥偃與試偃乃
盛度壻又錢惟演親戚欲乞下別處詔送舍人院試自
是有親嫌者並如例

壬戌責授勾當翰林司入內都知宮苑使張景宗為左

驥使皇城使王遵度為翰林使崇儀使李昭慶為西
京左藏庫使勾當皇城司韓守恩周懷政藍繼宗並罰
金悉依前充職坐翰林司藥童挾刃入本署殺其同類
故也

王遵度宮郟攀附者不詳其里邑見王
繼忠傳李昭慶繼隆長子後改名昭亮

癸亥以久雨命近臣詣廟社宮觀佛寺神祠祈禱

甲子京東西河北轉運使言河決壞民田輸稅難阻詔
應經水州縣夏稅許從便送納田產壞者特倚閣之

丙寅光祿少卿薛顏言滑州自今月三日雨五晝夜未

止河水增漲北岸逼州城請權徙甲仗錢帛置通利軍其軍民聽從便遷徙詔顏規度固護必不可則如所請

考究竟曾
徙與不

丁卯詔福建州軍偽命已前部民子孫別籍異財今祖父母已亡詣官訴均分不平者不限有無契要並以見佃為主官司勿為受理尋詔江南諸州軍亦如之

戊辰詔以十一月十九日有事于南郊命向敏中為天書儀仗使南郊大禮使寇準為天書同儀仗使丁謂為

副使李迪為扶侍使翰林學士承旨晁迥為南郊禮儀
使學士錢惟演為儀仗使太子賓客王曙為鹵簿使權
知開封府馬元方為橋道頓遞使入內副都知周懷政
為天書扶侍都監自封禪已來特命輔臣兼五使之職
及是始復舊制 步軍都虞候英州防禦使馮守信自
言占籍滑州頗習隄防利害即命為修河都部署知滑
州崇儀使入內押班鄧守恩為修河鈐轄內殿崇班楊
懷吉為都監 命內殿崇班閤門祇候張綸赴辰澧鼎

州安撫招捉蠻人知辰州史方知澧州曹克己辰澧鼎
州都巡檢使柴忠荆南駐泊都監趙振同其事供奉官
閣門祇候張元晉赴施州安撫招捉蠻人知施州劉永

崇同其事尋命綸知鼎州其安撫招捉蠻人事悉罷

張元

晉未詳何許人綸知鼎州在七月庚辰今并書招捉蠻
人事並罷本史會要並不詳當考范仲淹誌綸墓云公
之典辰溪也彼蠻人中彭姓一族稱其強占溪洞數州
署兄弟以為守國家因其請焉後乃驕叛邊鄙既襲城
邑朝廷患之公至築蓬山館理新興棚以要其道且省
戎兵條舉十事不及四五而有平涼之行蠻又侵我帝
復召公曰僉謂彼可殲焉朕惟弗忍汝往圖之公再拜
稽首曰惡草雖微天地不能絕其類先王敝之無猾夏

爾帝曰俞惟康厥民居公馳傳以臨謂彼蠻者不威不
懲不見利不勸廼以謀夫駭其族曰天家使且至方撤
兵四道焚若山林毀若巢穴弗滅弗已蠻乃大懼請命
公曰納爾爵秩歸我老孺天子聖且仁吾為若請蠻如
其教乃疾置以聞詔原之復其命數貢賜如平日生齒
之還者對以刀布作石柱刻蠻人之誓揭于疆首自茲
威懷迄今將二十年蔑復為患詩云式固爾猷淮夷卒
獲翩彼飛鴉集于泮林食我桑椹懷我好音謂蠻如惡
禽亦感而化仲淹誌或指此也
柴忠未詳趙振雄州歸信人

殿前都指揮使忠武節度使曹瑋被疾上親幸其第臨
問壬申命翰林草制改節度河陽加同平章事制入而
瑋卒車駕即臨奠之贈中書令諡武懿以其子西上閣

門副使儀為引進副使又錄其二姪外孫官璨起貴胄以孝謹稱皆自奮勵以世其家習知韜略好讀左氏春秋雖無攻戰之效然累歷邊任領禁衛十餘年善撫士卒忠厚謙靜未嘗有過國朝以來重世將相非恩澤進者惟璨一門徐許二鎮又皆世官時論以為榮晚節頗傷吝嗇物議少之璨母常閱其家帑見積錢數萬召璨謂曰汝父履歷中外未嘗有此積也信汝不及父遠矣三司假借內藏錢帛二百四十五萬

戊寅賜歙州婺源縣民汪正爵公士蠲本戶差役以捕獲強盜故也

己卯羣臣表上尊號曰體元御極感天尊道應真寶運文德武功上聖欽明仁孝不允凡五上從之

庚辰屯田員外郎鍾離瑾言竊見諸州長吏才境內雨足苗長即奏豐稔其後霜旱蝗螟災沴皆隱而不言上罔朝廷下抑氓俗請自今諸州有災傷處即時騰奏命官檢視如所部豐登亦須俟秋成日乃奏如奏後災傷

者聽別上言隱而不言則論其罪從之

八月乙酉朔交州李公蘊遣其弟鶴來貢方物

丁亥以天書再降于乾祐縣大赦天下常赦不原者咸除之諸軍並與特支屯駐在外舊無例特支者皆給與賜乾祐縣民秋租十之五並度諸道釋董行廣南官吏聽挈家之治所制曰朕寅奉丕基撫寧中宇慶靈積厚高明博臨受河洛之秘書開聖真之鴻緒陳嘉牲於崇獻沈瑄玉於隆睢順拜文蜀之壇恭薦鏤瓊之版儲精

淵妙敷化醇醲矧惟咸鎬之區是為神明之奧名山之
內福地在焉載嚴曲密之都式佇鴻濛之駕清心昭格
璿極鑒觀由茲鵜首之封薦錫龍綈之檢諭朕以輔德
勗朕以愛民告臨降之先期述延洪之景祐介子孫於
千億保宗稷於大寧而又乃顧皇儲繼頒寶命昭其仁
孝之志示以報應之祥齋莊載披惕厲彌至考諸冊牒
允謂殊尤昔燧皇握機但有蒼渠之刻虞舜貝辰止觀
河渚之文豈若祚乃菲躬慶及元嗣膺茲繁祉實冠皇

圖思與萬邦共均純嘏仰答高昊之貺用推肆眚之恩

郊恩密邇忽降大赦蓋以乾祐天書再降故也及周懷政朱能等敗史官諱之遂改易制辭自恭薦鏤瓊之版以下但云迨茲二紀馴致小康邦本既寧天休允集顧惟陰騰奚獨在予思與萬邦共膺純嘏遂大赦天下臣燾初讀實錄國史固疑此赦之必有所為也檢會要云以天書而赦文殊不及之因今於諸州所編錄建隆以來赦文內尋出全本則其辭蓋昭然且朱能等偽造天書實錄正史皆略之惟此制辭差詳恐其亡逸今特著于此原史官所以深諱者為過舉也過而能改善莫大焉此尤可見真宗之盛德也若乃未發其事竄改其辭使後人漫不可曉既失史官之職又沒帝王改過之善臣燾所以不敢從也此會要乃三朝會要今五朝會要已改云以天下小康故降赦蓋從史也孫奭等諫疏或在此赦後然三月末已載之不復遷改且天書實再降

則爽等於初降即上
諫疏亦不可知爾

命樞密直學士王曙客省副使

焦守節馳驛詣滑州與馮守信京東河北轉運使等議
修河夫役時日功限以聞既而守信言河水湍急未可
興作請俟來歲正月詔至時以軍士六萬七千丁夫二

萬充役

守信所言在
壬寅今并書

戊子以光祿少卿薛顏為少府監知江寧府邇者晝劫
人反執平人以告顏視其色動曰爾真盜也械之果引
伏三司言白波發運司采梢三百萬計用船二千隻

望遣內官一員於泗州已來撥借公私船供應詔止以

官船充用 滑州言龍見于決河

辛卯太白復晝見

乙未徐州言河決水大至城不沒者四版 廊延路副

都部署曹瑋以兄璨卒請暫赴京師優詔不許 初彰

德軍留後馬知節以疾病留京師踰年表求外任命知

貝州兼兵馬部署將行請對上閔其羸令歸本鎮上黨

大名之民爭求迎謁所苦寢劇遣其子將太醫往診視

俄求還京師復遣其姪承傳齎詔俞其請至則已卒遺命諸子令辭詔塋上深軫悼之贈侍中諡正惠贈賜加等官其子孫四人知節習兵事以方略自任頗涉文藝每應詔亦為詩詠所與遊接必一時名士為治專務抑豪強卹孤弱性剛直敢言無避未嘗少自卑屈求之武人蓋鮮儷云

己亥大會道釋于天安殿凡萬三千八十六人先是建道場是日上親臨視以藥銀鑄大錢面賜之釋開封

府繫囚杖以下罪

壬寅詔謀殺故殺劫罪至死因丁亥赦原者諸州並依強劫賊例刺配本城情重不可宥者部送京師自今著為定式

丙午三司使李士衡言京西河北轉運司計度於河東晉絳州發糧儲三十萬赴滑州山路險峻慮或愆期請止於滑州通利軍入中優給其直從之

戊申自瓊林苑迎奉天書入內

庚戌遣使安撫水災州軍度支員外郎判度支勾院方仲荀京東路右正言判戶部勾院劉晔京西路鹽鐵判官監察御史劉平河北路有合寬卹改更事件與轉運使副所在長吏會議施行 詔倉草場令司天監依先降指揮差人監門以替使臣仍自今有犯贓罪者永不
得差

九月乙卯供備庫使侍其旭言廣州多蕃漢大商無城池郭郭雖有海上巡檢又往復不常或有剽劫則乏禦

備請徙廣恩州海上巡檢一員廨於廣州市舶亭南所
冀便於防遏從之

庚申三司假內藏金二千七百兩

壬戌命吏部郎中直史館兼太子左諭德崔遵度為契
丹生辰國信使西京左藏庫使王應昌副之三司鹽鐵
判官監察御史劉平為正旦使供奉官閤門祇候張元
普副之是日重陽賜宴苑中宰臣向敏中暮歸暴中
風眩亟命中使挾太醫診問

乙丑詔徐州民僦居官舍者免其直 賜大理寺丞王質進士及第質旦之猶子獻文召試故也 詔割澶州公用錢百萬分給衛州通利軍俟河平日仍舊時轉運使以河流注溢澶州路絕使車皆由二州軍故有是詔庚午以滄州樂陵縣尉郭上行為本縣令賜緋旌捕賊之勞也 三司使李士衡言京師每歲所用材植並令陝西州軍給錢配買農民重費逋欠尤多請自今聽民採斫入中官置場納之給以文引詔可仍悉蠲所逋欠

甲戌以河北轉運使戶部郎中段暕為太常少卿知廣州尋加右諫議大夫暕頗精吏事素與丁謂善故謂亟用之及歸自南海而謂已敗故亦不復處要劇云 詔自今應犯賊注廣南川峽幕職州縣管委逐路轉運使常加糾察再犯賊罪者永不錄用時司勳員外郎梁象言川峽幕職州縣官曾坐賊左降者多復恣貪踰以擾遠民請自今犯賊者不注川峽官並除廣南遠惡州軍上以廣南亦吾民也且非自新之道故特有是詔

丙子詔宗室輔臣學士三司使副尚書丞郎給諫舍人待制直龍圖閣于清景殿觀御製賜皇太子元良述六藝箴承華要略十卷授時要略十二卷又以國史兩朝實錄太宗文集并御集御覽羣書賜皇太子遂宴從官辛巳給事中參知政事兼太子賓客李迪言昨日東宮賜宴臣獲陪侍皇太子舉動由禮言不輕發視伶官雜戲未嘗妄笑左右瞻仰無不恭肅上曰常日居內庭亦未嘗妄言也寇準曰皇太子天賦仁德嚴重溫裕復稟

聖訓勤道力學實邦家之慶也 登州言高麗遣禮賓

卿崔元信來貢元信至秦王水口遭風覆舟漂失貢物
人多溺死詔遣中使存撫之又令登州凡入使物色官
給脚乘津遣赴京

壬午徐州張昊言伏覩辛亥制書罪無輕重咸赦除之
又覩近詔官典犯賊奏裁伏以渙汗之恩出則不復絲
綸之命審乃惟行弛而復張民不為信願守一成之法
免煩三尺之科詔從之

冬十月丙戌以知秦州太常少卿李及為左司郎中樞密直學士依前知秦州 秘書監知禮儀院判秘閣太常寺楊億丁內艱時方講郊祀以億典司禮樂之任未卒哭起復工部侍郎令視事

丁亥詔益梓利夔州路緣邊界人銅器許於邊界用之州縣勿責其違禁其內地百姓齎入邊界鬻者即論如法先是富順監言始姑鎮邊人家有銅鼓子孫傳秘號為右族而朝法所禁故有是詔 中書言應保舉幕職

州縣官充京朝官請俟所舉將及五人即以名聞庶懲
濫進從之 令保安軍築子城從鄜延部署曹瑋之請
也

壬辰召宗室近臣於後苑觀西天綠豆小香占城稻上
作詩使之屬和

甲午免衛州民三年科率以蝗旱流移新復業故也

乙未三門發運判官殿中丞王直為監察御史充三司
度支判官直上書言河決事稱旨故獎之

丙申禁興劔利等州三泉縣白衣師邪法

己亥禁京師民賣殺鳥獸藥

庚子詔西京分司官太府卿裴莊職方郎中韓昌齡將
來郊裡各許奏蔭一子時莊等上封陳乞中書言分司

官無此例上閔其年高特有是命

韓昌齡初見咸平四年七月

先是滑州浚減水河畢功設祭有鹿隨流而下獲之孟
州河陰縣水次獲龍卵皆以獻辛丑召輔臣觀於後苑
己酉知審刑院盛度言在京及諸路止有斷案三道值

降聖節不奏自餘絕無刑牘請宣付史館寇準曰漢文帝唐明皇時皆幾乎刑措蓋當時諸侯專殺有聞於朝廷者有便宜而行者今幅員萬里徒流以上合聞達者皆奏牘以此較之則聖朝刑訟清淨過古昔矣此陛下以德化民精意欽卹所致臣等不勝大慶再拜稱賀詔獎度等

庚戌免京城和市修河芻藁

辛亥詔滑州修河兵夫方屬凝寒宜令官吏常切存撫

無令失所

御史中丞馬亮建言士民父祖未葬母得

輒析從之

此事不得其時因亮為中丞即附見

詔糾察刑獄司自今免

鞫劾公事

如有定奪即仍舊先是糾察官呂夷簡言本

司累奉詔旨勘鞫定奪公事或止將公案詳閱亦無妨

礙若勘鞫公事即動須追逮罪人辨證詞理顯是兼置

刑獄不便故令止之

中書言三司判官轉運使副秩

滿當遷者但進士及第或帶館職者皆欲授名曾從之

景祐元年六月
癸丑可參考

十一月乙卯詔自今犯酒麴銅鑰等有死刑者去之中書參詳請令所在杖脊黥面配五百里外牢城詔可

丁巳吏部流內銓言本司令錄稍多員闕甚少請權借審官院京朝官知縣闕注擬一任詔審官院以五千戶以下縣借之又言舊格廣南西川幕職州縣官偶有假故三二十日或一兩月即不叙為資考赴調日再任遠地請自今一兩月以下偶有私故不滿任者並為成資更不再注遠任從之

戊午詔翰林侍讀學士刑部侍郎張知白序班在玉清
昭應宮副使林特之上時知白自天雄軍徙應天許便
道朝覲故也

己未張知白言河北提舉捉賊司指使殿侍王應捕賊
有勞身中重創命補三班借職

辛酉閤門太常禮院上大禮稱慶合班圖皇太子序位
在宰相上太子懇讓上以諭輔臣寇準等面陳儲副之
重不可謙抑望遵儀制凡再請乃許詔自今給事中

諫議大夫中書舍人母妻並封郡君初止封縣樞密直學士給事中王曙冠準女壻也因改舊制議者非準專

私而不忘

專私不忘據掖垣叢志

戊辰翰林學士錢惟演言正陽門習儀皇太子立於御坐之西左右以天氣暄煦持繖障日太子不許復遮以扇太子又以手却之文武在列無不瞻覩有司設馬臺於太廟內太子乘馬至門命移出蕭屏外下馬步進及南郊壇前驅者解青繩將入外壝太子亟止之將及外壝

即下馬伏以太子英獻之德既自天資謙恭之志實遵
聖訓雖漢儲被詔不絕馳道五官正服以見侍臣比茲
巨美不可同日而語矣昔桓榮以諸官專精博學謂之
國家福祐書于史冊今太子持謙秉禮發自至誠士民
傳說充溢都邑伏望宣付史館以彰盛德詔獎皇太子
仍優答惟演

己巳謁景靈宮

庚午饗太廟

辛未合祭天地于南郊大赦天下非刼殺鬪殺已殺人
十惡至死偽造符印持火盜官物官典人已賊咸除之
鬪殺可閔者奏裁 河北河東陝西緣邊監當京朝官
使臣幕職州縣官自今並許攜家赴任川峽廣南監押
巡檢駐泊捉賊監當使臣並與二年一替川峽幕職州
縣官得替不押綱運者並給倉券供奉官以下充閤門
祇候者自今五年考課其三班使臣合磨勘者雖外任
亦許施行見在銓曹幕職令錄未注擬者兩任五考以

上無賊罪者皆以名聞乃詔翰林學士盛度樞密直學士王曙左諫議大夫王隨與判銓陳堯咨宋綬同試身言書判優者與京官次則幕職循資令錄與幕職又次者皆補近便大處自是每有郊恩悉然知應天府王曾言府民五戶共撲買酒場歲課三萬餘緡逋欠積久其兩戶已破產三戶累嘗披訴而計司慮虧歲課不肯與奪乞賜蠲減上謂輔臣曰南京太祖興王之地比他處尤當優卹豈可靳茲小利重困吾民乃詔依東西京

例令民取便買麴醞酒其三戶逋欠悉除之是日夜漏未盡二鼓大風揚沙寒甚壞青城就陽門幔屋日出乃止

甲戌皇太子言於玉清昭應宮建殿置經藏以資聖業功畢有詔褒答賜殿名曰長生崇壽

丁丑謁玉清昭應宮還御天安殿受冊尊號

己卯崔元信率東西女真首領入見別貢中布二千乞佛經一藏詔賜之還其布以元信覆溺賈乏別賜衣服

繒綵焉女真首領又言各以本土馬來進貢中途皆失
詔特給其直

庚辰禮儀院言自今文武官丁父母憂起復不赴宴會
外自餘服制式假滿日並赴奏可 契丹遣使工部尚

書蕭霞哩副使尚書左丞馬翼來賀承天節 中書言

諸道租賦欺隱至多官私土田侵冒亦甚欲條貫畫一

專委逐處提點刑獄管勾從之

此據會要天禧三年十一月事當考詳

十二月癸未朔賜自京至滑州馬遞軍士絹綿袍

丙戌富州蠻酋向光澤表納疆土上曰朝廷得之安用當是其親族不相容爾命轉運司察之果然

辛卯右僕射門下侍郎平章事向敏中加左僕射中書侍郎兼吏部尚書冠準加右僕射通王元儼為保平定國節度使進封涇王敏中以病不與祀事奉表辭所加官又繼表求解皆不許宣徽北院使知樞密院事檢校太尉曾利用吏部尚書叅知政事丁謂並為樞密使時輔臣以郊恩俱進官故事嘗為宰相而除樞密使始

得遷僕射乃以謂檢校太尉兼本官充使樞密使舊兼

御史大夫自利用謂始去之

兼御史大夫據會要當考太平興國六年九月石熙

載始用文資正官充使

賜宰相御製正說奉道詩各十卷歲時

新詠三卷

癸巳以同知樞密院事任中正周起為樞密副使

乙未三司奏準詔與內藏庫議自今擬鹽稅錢及歲別

出錢六十萬赴左藏庫給用從之

熙寧五年二月十七日改此制當考

丙申謁啓聖院太宗神御殿 今西京增給應天禪院常

住錢日三千從馮拯之請也 戶部員外郎知制誥晏

殊等言舍人院書籍殘缺帷帳什物多敝公錢至少望

賜國子監印本經書令儀鸞司供帳冬季三司給炭乃

增月給為三十千餘從其請

戊戌謁玉清昭應宮景靈宮

壬寅幸會靈觀祥源觀上清宮開寶寺

乙巳詔諸路州府軍監都知兵馬使年滿委轉運使閱
才質書札堪班行差使即令赴闕其不堪者並送本所

依舊例補攝長史司馬

丙午翰林學士錢惟演上言伏見每賜契丹高麗使御筵其樂人詞語多涉淺俗請自今賜外國使宴其樂人詞語教坊即令舍人院撰京府衙前令館閣官撰從之既而知制誥晏殊等上章援引典故深詆其失乃詔教坊撰訖詣舍人院呈本焉

戊申契丹遣使左武衛上將軍耶律繼宗副使衛尉卿鄭去瑕來賀明年正旦

辛亥淮南轉運使言宿毫等十六州軍仍歲旱其來年
第三等已下民戶蠶鹽請權罷給從之

是月河中府處士李瀆陝州處士魏野皆卒詔各贈秘
書省著作郎賜其家帛二十四米三斛州縣常加存卹
二稅外蠲其差役瀆性嗜酒人或勉之答曰扶羸養疾
捨此莫可從吾所好以盡餘年不亦樂乎預知死期因
促家人置酒與諸子訣野與瀆有連瀆訃至野哭之慟
謂其子曰吾不可去去必不至第遣其子赴之才六日

野亦死時甚異焉野善王旦冠準每贈詩必勸以早退
旦準皆不能用識者高之 供備庫使郭懷玉為金部
員外郎提點中書五房公事

是歲天下戶八百五十四萬五千二百七十六口一千
九百四十七萬一千五百五十六

--	--	--	--	--	--	--	--	--

欽定四庫全書

續資治通鑑長編卷九十五

宋 李燾 撰

真宗

天禧四年春正月戊午以滑州將塞決河命翰林學士
盛度乘傳致祭

乙丑以華州觀察使曹瑋為宣徽北院使鎮國軍留後
簽署樞密院事簽署兼領藩鎮自瑋始也

以使兼領
自彬始

吏部流內銓言諸試銜官齋郎奏授出身白衣選人未經歷任無所升降請自今更不引對依格敕注擬知制誥呂夷簡言諸州軍績降宣敕多闕編錄望令諸路提點刑獄司常切檢視從之

丙寅令利州路轉運司賑貸貧民旱故也

己巳幸元符觀資善堂

辛未鄜延部署言宥州蕃族拉爾率衆劫熟戶密威族延州金明縣監押西頭供奉官李士彬部兵擊之斬拉

爾臬七十餘級奪馬三百匹餘衆悉擒詔部署司以其
事報趙德明擢士彬為都監加東頭供奉官閤門祇候
士彬弟殿直士筠為右侍禁依前提點族帳事補蕃卒
色伊喇勒為軍主餘第遷之仍賜衣帶茶綵俸料 詔
諸民偽立田產要契託衣冠形勢戶庇役者限百日自
首改戶輸稅限滿不首許人陳告命官除名餘人決配
所在揭榜示之

丙子改諸路提點刑獄為勸農使副使兼提點刑獄公

事仍詔所至取民籍視其差等有不如式者懲革之勸
卹農民以時耕墾招集逃散檢括陷稅凡農田一事已
上悉領之仍各賜農田牧一部 詔銓司增注桂廣等
州幕職官常及五員擇壯年幹事者充令供本職外仍
備轉運刑獄司差遣

庚辰詔三京諸州取進士諸科三舉已上曾經御試無
罪犯者量試藝業揀材質書札解送赴闕當議於班行
錄用如經御試者數少許即選五舉以上南省終場下

第人充

辛巳命右諫議大夫張士遜詣滑州祭河詔馮守信俟
河平留兵萬人護之

二月癸未朔以淮南江浙穀貴民飢命都官員外郎韓
億閭門祇候王若訥乘傳安撫發常平倉粟減直出糶
以賑之民有以糧儲濟衆者第加恩獎其乏食持仗盜
糧者並減等論罪

乙酉廣州言注輦國遣使貢方物其使者至州死以

其表來上詔本州宴犒其部下賜器幣緡錢遣之

丁亥戶部員外郎兼太子右諭德魯宗道言伏見代州寨主吳太初以捕獲私鹽決訖撤去殿直田夢澤於公廨課子弟種麥半畝咸以贓罪不許叙用竊惟天下羣官如此類甚衆慮涉秋荼之繁仰玷春臺之化欲望委刑部自今羣臣除故枉法受贓外其因事計贓情可憫者並奏裁從之宗道又言臣往任歙州判官日坐預借俸錢贖銅六斤赴調日刑部定為公罪大理定為私罪

及再詳議刑部讞為私罪大理讞為公罪兩司更互僅
同兒戲徒使選人淹延費用望自今選人有罪令銓曹
於刑部大理寺兩司中止問一處庶免稽留望銓曹自
今刑部大理寺定選人罪名不一即送審刑院速詳定

以聞

定罪名在五月
辛酉今并書

戊子右街講僧秘演等表請以聖製述釋典文章命僧
箋注附於大藏有司按太宗朝故事請許之詔可仍遣
近臣詳覆中貴人掌其事

辛卯參知政事李迪等上一州一縣新編敕三十卷

本志

作一州二縣會要并言一司
一務一州一縣今從本志

祠部員外郎秘閣校理

李垂言準詔至大名府滑衛德貝州通利軍與長吏計

度疏塞河流有無妨閼臣所至並稱黃河水入王莽沙

河與西河故瀆注金赤河必慮水勢浩大浸蕩民田難

於隄備臣以謂河水所經不無為害少命疏治之則本

州長吏不得專其封土矣今者河決而南為害既多而

又陽武埽東石堰埽西地形汙下東河泄水又難或者

云今決處槽底坑深舊渠逆上若塞之旁必復壞如是則議塞河者誠以為難若決河而北為害雖少一旦河水注御河蕩易水徑乾寧軍入濁流口遂及戎境或者云因此搖動邊鄙如是則議疏河者又益為難臣於兩難之間輒畫一計請自上流引北載之高地東至大伾復瀉於澶淵舊道使南不至滑州北不至通利軍界何以計之臣請自鄆州東界曹公所開運渠東五里河北岸亞處就岸實土堅引之正北近東十三里破伯禹古

隄注裴家潭徑牧馬陂又正東近北四十里擊大伾西山醜為二渠一逼大伾南足決古隄正東八里復澶淵舊道一逼通利軍城北曲河口至大禹所道西河故瀆正北稍東十里開南北大隄又東七里入澶淵舊道與南渠合夫如是則載之高地大伾二山於肱股之間分酌其勢浚瀉兩渠匯注東北不遠三十里復合澶淵舊道則滑州不治自涸矣其通利軍如河陽中城於兩河之間加以大伾二山居中作固莫能壞也朝廷必欲漸

而緩成先疏大伾南足一渠則滑州亦已無患矣臣請以兵夫二萬自來年二月興作除三伏半工外至十月而成其均厚裨薄俟次年可也疏奏朝議懼其煩撓罷之癸巳以利州路階成民飢遣侍御史姜遵閣門祇候張士安馳驛安撫之

張士安未見

詔忻州知州入辭日升殿

奏事時命供奉官閣門祇候張淡成知忻州事知州舊無

上殿例因淡成之請特有是詔

會要二月十三日
事張淡成當考

今并

代忻三州減直糶常平倉以濟飢民

甲午密州莒縣馬耆山九經楊光輔為國子四門助教
加賜束帛詔長吏常存問之光輔聚徒講授三十餘年
知州王博文為言故命以官負海有鹽場歲饑民多盜
鬻者吏捕逐則羣起捍鬪皆坐法當死博文請弛鹽禁
俟歲豐乃復從之弛鹽禁不得
月日今附見
丙申詔曹濮鄆單徐州淮陽軍賑貸貧民以決河為害
故也

丁酉以樞密直學士左司郎中知泰州李及為右諫議

大夫依前充職

滑州言河塞詔獎之己亥命翰林學士承旨晁迥致祭
又遣官謝京城宮觀諸陵岳瀆靈山勝境

庚子羣臣詣崇德殿稱賀賜修河部署鈐轄轉運都監
官吏使臣等衣服金銀帶器幣將士緡錢有差是役凡
賦諸州薪石楳檟芟竹之數千六百萬用兵夫九萬人

上親製文刻碑以紀其成功

李若谷傳云若谷為京東轉運使河決白馬調取楳

芟同列盧士倫協三司意趣刻檟州縣若谷寬之士倫
不悅譖諸朝徙若谷知陝州實錄乃無此事今不取

辛丑令唐鄧等八州發常平倉粟減價出糶以濟貧民
壬寅詔應緣滑州役卒亡命者限兩月首罪優給口糧
送隸本軍其因罪為部署司所移配者亦送還本籍所
在揭榜告諭之

戶部員外郎知制誥李誥不為寇準所知每草辭必再
三却之令換易乃已誥嘗用淑慎字準難之曰淑慎婦
人事也誥執毛詩詣閤呈準曰淑慎君子其儀不忒此
安有婦人之事準性強固又別加詆誚卒改之誥因是

積憤又以父留鄉里請外乙巳命諮知荆南府代給事中樂黃目知潭州長沙月給舊減於荆者特詔增之又諭以兵賦繁綜寄任之意詔諸州所須醞酒黃糯米染色紅花紫草等自今乘時收買無以抑貧民

丙午明州言高麗夾骨島民閤達以風漂舟至定海縣岸詔本州存問給度海糧遣還自今有此類準例給遣訖以聞

己酉馬軍都虞候并代副部署楊崇勲為客省使依

前英州防禦使兼羣牧使同勾當三班院皇城司其月俸如管軍防禦使例初羣牧置使皆以文臣領之惟崇勲自都監至為使凡九年屬天下久罷兵有言鬻廐馬者崇勲曰馬者戰之備雖無事可去耶遂寢其奏

庚戌賜光祿寺丞沈惟溫同進士出身惟溫倫之孫獻太祖太宗與倫御署書求賜科名故也

三月戊午淄州民飢貸以牛糧 詔翰林學士以下龍圖閣直學士以上自今官未至給諫者該恩叙封母妻

並如給諫之例初王曙既改舊制盛度以兵部郎中為
學士因乞封其母許之乃降是詔其後天章閣直學士
亦如龍圖閣直學士

庚申甘州輝和爾可汗王伊嚕格勒圭呼遣使來貢

甲子令府州賑貸蕃部去歲旱故也

乙丑右司諫直集賢院祖士衡言伏見太宴皇帝更衣
降坐羣臣謝賜花止拜於坐次欲望自今每更衣所司
揖羣臣下殿候皇帝降坐則羣臣班於殿庭皇帝升坐

乃上殿如賜花則拜於庭又常朝起居日長春崇德殿
假日後殿中書樞密院文武合班而閣門祇候一員在
前隨班再拜側立贊謁以臣愚見未協矩儀欲請自今
令通班閣門祇候在前殿則與內殿供奉官以下同起
居後殿則與軍頭司官同起居然後立殿庭贊謁從之
戊辰改禎州為惠州 罷給揚州蠶鹽一年從韓億之
請也

庚午詔審官院流內銓自今羣官中川峽人有科名歷

任無贓罪經薦舉者三任內許一任去本貫三百里外
守官其年老致仕者亦聽還鄉

壬申令西涼府輝和爾自今貢奉並由秦州路出入秦
州言蕃部阿錫達納質歸順

先是詔以近年開封府舉人稍多屢致詞訟令翰林學
士承旨晁迥等議定條約於是迥等上言諸州舉人多
以身有服制本貫難於取解遂奔湊京轍寓藉充賦人
數既衆混而為一有司但考其才藝解送之際本府土

著登名甚少交起喧競亦由於此欲請自今有晷週卑
幼以下服者聽取文解寄應舉人實無戶籍者許召官
保任於本府戶籍人數外別立分數薦送詔從之仍取
大中祥符七年寄貫人數中進士解十之三諸科十之
五癸酉詔川峽廣南諸州自今依先定條制解合格舉
人外更有藝業可取者悉取薦送

本志不及廣南當考
又當考合格舉人元

數

乙亥以益梓州路物價翔踊命知制誥呂夷簡引進副

使曹儀乘傳賑卹之夷簡等請所至勞問官吏將校仍
取繫囚與長吏等原情從輕決遣民願出穀救飢民者
元詔多加酬獎望給空名告數付臣等往從之

丙子詔自今縣尉獲鬪殺全火賊資考當入令錄者授
節察推官

戊寅詔三司言前詔江淮兩浙荆湖五路部綱殿侍聽
挈屬隨行其惠民石塘廣濟黃御蔡河押薪炭者望令
準例從之

前詔乃二年九月
二十八日見會要

己卯左僕射兼中書侍郎平章事向敏中卒上即時臨
哭之慟贈太尉中書令謚文簡五子洎諸壻並遷官親
族授官者又數人敏中端厚愷悌多智寡交特為人主
所重以至顯達歷踐中外曉民政善處繁劇識大體容
靜達權累在衡軸門無私謁諸子不令釐務雖當大事
若已不預焉謹於采拔不妄推薦姿表瓌碩有儀矩能
談論為大僚幾三十年時以重德目之上所優禮故雖
衰疾終不得謝亦以此為恨及追命制入上特批一幅

敏中端謹溫良宜益此意其恩顧如此

夏四月壬午朔翰林學士錢惟演言伏以春秋朝陵載於舊式公卿親往蓋表三恭歷代以來國章斯在唐顯慶中始詔三公行事天寶以後亦遣公卿巡謁蓋取朝廷大臣不必須同國姓後唐參用太常宗正卿晉開運中亦命吏部侍郎李詳其例甚多近年以來止遣宗正寺官人輕位卑實虧舊制望自今於丞郎諸司三品內遣官或闕官即差兩省諫舍以上所冀仰副追孝之心

以成稽古之美詔付有司詳定且言按唐顯慶五年詔三公備鹵簿分行二陵太常卿為副長慶元年通取尚書省四品以上清望官及諸司五品以上清望官充開寶通禮差太常宗正卿今請依禮三陵用太常宗正卿如闕官即差尚書省四品以下兩省五品以上諸司三品或卿監其分拜官二員用尚書省五品以上詔可如闕卿監以上官即以次差攝審刑院刑部大理寺奏自今所舉幕職州縣官充詳斷法直官請試律五道取

三道以上仍斷案三二十道稍合格例則保明聞奏從之

丙戌令杭州葺故吳越王錢氏廟從其孫惟演之請也以旱遣近臣分詣諸宮廟寺觀禱雨

丁亥大風起西北飛砂折木晝晦數刻命中使詣宮觀建道場禳之

翰林學士承旨晁迥累表求解近職庚寅授工部尚書集賢院學士判西京留司御史臺許一子官河南以就

養命工部侍郎楊億為翰林學士大中祥符末億自汝州代還久之不遷或問王旦曰楊大年何不且與舊職旦曰大年頃以輕去上左右人言可畏賴上終始保全之今此職欲出自清衷以全君臣之契也踰六年乃復入禁署於是令億序班在帷演下盛度上惟演言億景德中已為學士况今與臣並官丞郎望升億班在臣上從之詔自今奏舉選人令有司候參選日考較有私罪及非時贊者別聽進止餘即報中書門下遣官同

判銓官考試引見 分江南轉運使為東西兩路從戶部判官滕涉之請以便按巡也 出內藏錢七萬貫付

京西路市軍糧

壬辰詔茶場權務自今令三司副使判官轉運使副制置茶鹽司舉歷任無賊私罪者監權務以京朝宮殿直以上使臣充茶場以幕職令錄充 京西轉運使言知襄州夏竦勸部民出粟八萬餘石賑濟飢民詔獎之

丙申杖殺前定陶縣尉麻士瑤於青州其兄大理評事

致仕士安削籍配隸汀州姪右正言直史館溫舒太常
丞直集賢院溫其並削職溫舒改太常博士監昇州糧
料溫其監光州酒稅家僮范辛等及州院司理院典級
冒名買場務人借詞進士王圭等並黥面決配廣南福
建遠惡州軍牢城家僮五十人分隸諸軍以臨淄宅一
區給其家邸店資財取十之三均給其族自餘悉籍之
其田莊本因平債吞併典質者許元主收贖本路勸農
使副青州知州通判悉降等差遣初士瑤祖希夢事劉

銖為府掾專以培克聚斂為己任兼并恣橫用致鉅富
至士瑤累世益豪縱郡境畏之過於官府士瑤素帷箔
不修又私蓄天文禁書兵器姪溫裕先有憾常欲訟之
士瑤懼乃繫之密室命范宰等三僕更守絕其飲食數
日死即焚之又嘗怒鎮將張珪遣家僮張正等率民夫
伺珪於途中毆殺棄其尸頃之珪復蘇訟於州典級輩
悉受士瑤賂出其罪承前牧宰而下多與抗禮未嘗敢
違忤及鎮海節度推官孫昌知臨淄憤其凶惡有犯必

訊理之士瑤常聲言遣人刺昌昌乃送其族寓於他郡
每夕宿縣廨列人嚴更為備士瑤復與王圭誣告昌不
公事又借同邑人姓名買場務先是侍御史姜遵風聞
士瑤幽殺其姪事奏遣監察御史章頻推直官江鈞往
鞠之姜遵劾麻氏不法實錄
在二月丙戌今附此於是併得他罪故悉加誅

罰焉仍詔刑部遍牒三京諸路揭榜諭民擢遵為工部
郎中孫昌為大理寺丞依前知臨淄縣賞其發摘姦伏
也國史載麻希夢事蓋因王皞百一編也司馬光記聞
景德初契丹寇澶淵將兵至臨淄麻氏率莊人千餘

據堡自守鄉里賴之全濟者甚衆至今基迹尚存謂之
麻氏寨兵退麻氏斂器械盡輸官留什二三以衛其家
鄉里賴麻氏以全濟此事當考或可增修然光載姜遵
為轉運使欲因此以立威名則誤矣遵在仁宗時乃將
漕京東
今不取
浮梁縣民臧有金者素豪橫不肯輸租畜犬數

十頭里正近其門輒噬之繞垣密植橘抽人不可入每
歲里正常代之輸租及臨涇胡順之為縣令里正白其
事順之怒曰汝輩嫉其富欲使順之與為仇耳安有王
民不肯輸租者耶第往督之里正白不能順之使手力
繼之又白不能使押司錄事繼之又白不能順之悵然

曰此租必使令自督耶乃命里正取藁自抵其居以藁塞門而焚之臧氏皆逆順之悉令掩捕驅至縣其家男子年十六以上盡痛杖之乃名謂曰胡順之無道既焚爾宅又痛杖汝父子兄弟爾可速詣府自訟矣臧氏皆懾服無敢詣府者自是臧氏租常為一縣先府嘗遣教練使詣縣順之聞之曰是固欲來煩擾我也乃微使人隨之陰記其入驛舍及受驛吏供給之物既至入謁邑甚倨順之延與坐徐謂曰教練何官也曰本州職員

爾曰應入驛乎教練使跼蹐曰道中無郊店暫止驛中
又曰應受驛吏供給乎曰道中無芻糧故受之又曰應
與命官坐乎教練使趨下謝罪順之即械繫獄置闇室
中以糞土甕環其側教練不勝其苦因順之過獄呼曰
今何不問我罪順之笑謝曰教練幸勿訝也今方多事
未暇問也繫十日然後杖之二十教練不服曰職負也
有罪當受杖於州順之笑曰教練久為職負殊不知法
杖罪不送州耶卒杖之自是府吏無敢擾縣者州雖惡

之然不能罪也於是為青州幕僚發麻氏破其家皆順
之之力云高麗嘗入貢道出州境中貴人挾以為重使
州官旅拜於郊順之曰青大鎮在唐押新羅渤海縱其
國王來尚當與之均禮今見陪臣奈何卑屈如此獨不
拜因上書論辨朝廷是之既誅麻氏上記其名召見改
著作佐郎優與差遣正史順之傳豪橫者乃休寧江氏
休寧屬歙州淳梁屬饒州今從司
馬光記閭光載此事尤詳故也傳云改官
知常熟縣光云簽判洪州不知孰是當考
丁酉詔寄班祇候自今準三班使臣所定年限考詔 三

司言福州官莊舊止隨私產一例收租請估直許見田
民買之詔第遣常參官一員與轉運使依漳泉州例均
定租課尋罷不遣

罷遣使在八月
辛丑今并書

戊戌謁啓聖院太宗神御殿遂謁景靈宮開寶寺

先是度支員外郎直集賢院祁暉出知濰州母亡殯於
州城之南暉既解官就殯所築小室號泣守護蔬食讀
佛經者三載徒跣經冬足墮二指有白烏白兔馴擾墳
側州異之以狀聞己亥降詔旌美及其歸葬又賜帛三

十足粟三十石令州長吏每月就所居存問暉膠水人也

庚子謁玉清昭應宮

癸卯利州路轉運使李防請雕印四時纂要齊民要術付諸道勸農司以勗民務從之

乙巳詔訪聞忻代州民秋後結朋角觝謂之野場有殺傷者自今悉禁絕之

丁未閣門請自今庶子已下至京官閣門祇候至三班

使臣並為一班文武羣官值假三日則朝見辭謝於崇政殿其酒食緡帛賜於門外奏可時上不豫故多從省約之制

先是左正言知制誥張師德移病出守潁州五月癸丑師德言皇弟德雍現任本州防禦使其署銜望降規式中書門下言據御史臺稱每大朝會立班皇親防禦團練使刺史並次節度使下稍退序立因詔師德署銜於德雍之下非典故也凡知制誥著位兩省則次給諫南

省御史臺次丞郎外官則在觀察使上云

此據掖垣志

甲寅詔禮部權停貢舉一年

丙辰詔獎涇原路都監李餘懿等補指使殿侍趙榮為三班借職以其擊殺蕃寇故也

丁巳令京兆鳳翔減直糶粟賑秦隴諸州流民

戊午開封府請撤民舍侵街陌者上以勞擾不許將作監丞通判果州張觀上言父居業見任越州支使年踰耳順猶滯選門臣今蒙恩授秘書郎願回授父詔流

內銓召居業考課引對其秘書郎告仍以付觀

己未益梓路安撫呂夷簡言秦隴利等州飢民稍多望
令逐處募充本城諸軍從之

初感德軍節度使知陝州王嗣宗以老病再表願入朝
且言得一見即歸田里優詔召還會郊祀改靜難節度
使留京師累月竟以足疾不任朝謁復上表求再知許
州宰相寇準素惡其為人庚申特命以左屯衛上將軍
致仕嗣宗乃請面辭詔免舞蹈許其子扶掖之對數刻

賜錢百萬及準罷相又特從其請令月給實俸五十千
嗣宗歷事三朝最為宿舊所至以嚴明御下尤傲狠務
以醜言凌挫羣類家有恩仇簿已報者即勾之晚年交
遊皆入仇簿為中丞日嘗忿宋白郭贄邢昺七十不請
老屢言於上請敕其休致又遣親屬諷激之及嗣宗眷
厚祿不忍去嘗謂人曰僕惟此一事未能免物議爾衆
皆嗤焉雅好為文而朴繆尤甚奉祀歲近臣皆令為頌
記宰相以嗣宗所撰不足發揮盛德慮為後所誚乃不

許刻石然敦睦宗族待諸姪如己子臨終著遺戒訓子
孫毋析居又令以孝經弓劍筆硯置壙中云

壬戌廣南東路轉運勸農司言準詔計度徙春州於古
城請依例於土人內注無贓罪幕職州縣官充通判兼
知州量與恩賜支錄事參軍俸給滿日依潭州龍巖等
縣例優獎從之

據本志景德元年移治陽春界明石津
古城大中祥符九年又併入新州天禧

四年
復置

甲子環州界熟戶密覺族軍王錦尼納質歸化以錦尼

領順州刺史首領目木多等十五人補蕃官有差

丙寅詔自今天下犯十惡刼殺謀殺故殺鬪殺放火強
刼賊官典正枉法贓偽造符印厭魅咒詛造妖言傳妖
術合造毒藥禁軍諸軍逃亡為盜罪至死者每至十二
月權住區斷過天慶節決之餘犯至死者十二月內及
春夏未得斷遣禁錮奏裁又詔大辟有先準詔即行處
斬者自今除惡逆四等準律用刑自餘斬刑遇春夏止
決重杖處死俟秋分如故以上封者言皇帝誕月及春

夏長育之時宜貸嚴科故也

張知白趙湘奏議可考知
白見咸平五年十一月相

見景德四年九月

丁卯兩浙淮南勸農使王貫之等導海州界石閘堰水
入漣水軍溉民田知定遠縣江擇知江陰軍崔立率部
民修廢塘浚石溝以灌高仰之地詔並獎之仍令代還
日考課引對因諭諸路勸農司應塘堰可以利民者準

此繕修

崔立事在明年六月
今從本志并書于此

甲戌以時雨沾洽遣官謝廟社宮觀寺院 保安軍小

蕃族都虞候日威巡檢胡懷節等擊賊有勞並進秩

己卯詔應緣河州軍自今每歲令長吏等與巡河及本地使臣躬親檢視隄岸當浚築者連署以聞勿復減省功料以圖恩獎違者重寘其罪 光祿寺丞謝絳上言

帝王之興必推五行之盛德所以配天地符陰陽也神農氏以火德有火星之瑞聖祖以土德地螾黃龍見夏以木德青龍止於郊商以金德山澤自溢周以火德有赤鳥之符國家膺開先之慶宜黜五代紹唐土德以繼

聖祖猶漢之黜秦興周火德以繼堯也臣聞太祖生而
包絡黃及受命五緯聚于奎而鎮星是主陛下升中泰
山日抱黃珥朝祀太清宮有星曰含譽其色黃而潤澤
其餘神龜珍獸自遠至者或毛或介或有厥應非土德
之驗乎茲事體大惟陛下勿以變古為疑且漢興至武
帝越九十年始寢尋於火德至光武蓋二百載方習定
乎正運國家受祚猶在五紀陛下謙而弗答氣壅未宣
河決遂潰豈不神哉考六府之厭鎮驗五行之勝尅亦

宜興土之運禦時之災不可因循舊典廢天人之休也
其度量律歷之則車服衣冠之法園丘方澤之事明堂
辟雍之制宗廟薦饗之序方國朝貢之典政教禮樂文
質增殺願下搢紳鴻碩之士參議條奏然後升中蒿告
上帝循五載見羣后以示中方之位以符用五之數時
大理寺丞董行父請用天為統以金為德詔兩制議皆
言用土德則當越唐上承於隋用金德則當越五代紹
唐而太祖實受終周室豈可弗遵傳繼之序絳行父議

皆黜不用絳濤子也

行父未見

六月甲申右諫議大夫李應機言嶺南惠州河源韶州翁源循州興寧錫場梅州管界縣分屬嵐瘴多處其令佐及梅州知州監押望並用廣南人充所異習其風土從之

乙酉陝西轉運使劉楚言自今陽武埽逃亡軍士有親屬在營者望令同華州依滑州修河例給三月錢糧有子願充軍量材質錄之詔可

己丑上御崇政殿親慮庶獄徒流遞減杖以下原之

壬辰詔通泰楚等州煎鹽亭戶因災乏食預請錢糧
逋欠者悉蠲之 審刑院言詳刑之官雖各勤盡然閱
實之際不無繆誤一有差舛即行勘劾頗塞自新之路
慮增巧詆之文請自今每大理寺封草檢至院有以杖
從徒以徒從杖以流入死以死入流之類即劄還本寺
如斷官顯知誤失自首改正則更不奏劾如其不然致
再下詰問顯章錯悞則具名奏劾從之 殿中侍御史

王博文言密州民有經大中祥符九年後累歲災沴飢乏親屬散在民間為人所收養及充奴婢妻口本無契券離書者望令畫時放還如有訴認官司不為理者並論違制罪從之

癸巳三班院言自今內地駐泊捉賊使臣請以合任遠地監押巡檢殿直以下習戎事者充仍支監押例添給代還日復任遠地從之

甲午以太常少卿直史館陳靖為太僕卿集賢院學士

知建州靖丁謂所善也

詔從翰林學士楊億等所請

選官箋注御製文集仍令宰相等參詳

丙申以右僕射兼中書侍郎平章事寇準為太子太傅
萊國公先是準為樞密使曹利用副之準素輕利用議
事有不合者準輒曰君一夫爾豈解此國家大體耶利
用由是銜之而丁謂以拂須故亦恨準及同為樞密使
遂合謀欲排準翰林學士錢惟演見謂權盛附離之與
講姻好而惟演女弟實為馬軍都虞候劉美妻時上不

豫艱於語言政事多中宮所決謂等交通詭秘其黨日

固劉氏宗人橫於蜀奪民鹽井上以皇后故欲赦其罪

準必請行法重失皇后意謂等因媒孽之準當獨請間

曰皇太子人望所屬願陛下思宗廟之重傳以神器以

固萬世基本丁謂佞人也不可以輔少主願擇方正大

臣為羽翼上然之

正傳云丁謂錢惟演佞人也不可輔
少主按此時惟演但為翰林學士不

當便與丁謂同日而語附傳亦不載惟演恐正傳誤增
之今不取張唐英仁宗政要又載準言丁謂恃才挾姦
曹利用恃權使氣恐唐英所載亦不得實利用恃權使
氣在太后垂簾時今猶未也陳繹拜罷錄亦止稱丁謂

準乃屬翰林學士楊億草表請太子監國且欲援億以代謂億畏事泄夜屏左右為之辭至自起剪燭跋中外

無知者既而準被酒漏所謀

億自起剪燭此據附傳今正傳削去龍川別志乃云

億私語其妻弟張演曰數日之後事當一新語稍泄丁謂夜乘婦人車與曹利用謀之不知別志何所據然別

志所稱立太子廢劉后則是準罷相後用懷政之謀而億所草乃太子監國表爾雖附傳亦以為微服過利用

為在此時蓋誤也拜罷錄與附傳同今正傳已改之謂附傳及拜罷錄並云草制正傳但云草表今從正傳謂

等益懼力譖準請罷準政事上不記與準初有成言諾

其請會日暮召知制誥晏殊入禁中示以除目殊曰臣

掌外制此非臣職也乃召惟演須臾惟演至極論進專
恣請深責上曰當與何官惟演請用王欽若例授準太
子太保上曰與太子太傅又曰更與加優禮惟演請封
國公出袖中具員冊以進上於小國中指萊字惟演曰
如此則中書但有李迪恐須別命相上曰姑徐之殊既
誤召因言恐泄機事臣不敢復出遂宿于學士院及宣
制則非殊疇昔所見者不知殊所見除目又何等也殊
不以告人故亦莫得其詳云

仁宗實錄冠準附傳陳繹
拜罷錄司馬光記聞張唐

英政要曾氏隆平集蘇氏龍川別志並誤以準初罷相時事即周懷政所謀蓋不考其月日故也國史正傳已略正之但不詳耳今取錢惟演日記及江休復雜志附益之請太子監國準奏也傳位太子廢皇后周懷政謀也準以監國奏洩罷相以懷政謀洩遠貶二事初不同諸書見準坐懷政絀即謂準本謀如此其實謀出懷政準未必知爾仁宗景祐元年四月以王曙言追謚楊億亦但云草奏請太子親政不云草制也龍川別志又云使億草詔書遣曙出使誅異已者曙藏去之恐實不然今止從實錄

監察御史章頻嘗

受詔鞫印州牙校訟鹽井事劉美依倚后家受賕使人

市其獄頻請捕繫上以后故不問出頻知宣州

頻事因寇準請

治劉氏附見不得其時也錢惟演日記五月二日寇公將制院文字上事連劉馬軍寇請赴臺勘上怒曰管軍

自前豈有此例卿要送臺但送下寇惶恐而退曹丁並奏天旱不宜更起冤獄中傷平人乞罷之上云便罷便罷冠又上殿上甚不悅其日寇沮喪甚惟演所言雖未可盡信章頻出知宣州必在此時今附見當考

呂夷簡言淳化末蜀民或從草寇刺面為應運雄軍今請擇其情罪重者分配潼關已東州府牢城從之滑

州言河決於天臺山下初議修河以天臺決口去水稍遠聊興葺之及西南隄城乃於天臺口旁築月隄亦非牢固議者咸請再葺修河都部署馮守信曰吾奉詔止修西南埽此非所及也會馬軍都指揮使王守贊外任

京師缺舊城巡檢守信承召亟歸及是河復決走衛南
汎徐濟害如三年而益甚人皆以罪守信焉守信通孝
經論語後遷威塞節度使五年三月其弟嘗欲上其子
為守信子以取高蔭守信對之慨然曰吾自行伍蒙主
上擢至此欲棄軀久矣顧未有所奈何欺之是歲并己
子無所蔭曰以明吾心於弟非有愛也人亦以此多之

此據
日記

己亥補教駿軍士李謙為本軍小校賜緡錢時軍使武

贊為逃卒霍興所刺謙急持興以身蔽捍中十六創贊得走免上善其義勇特召見而獎之

辛丑廊延路鈴轄周文質言趙德明繼遣人騎寇略熟戶望多發軍馬於慶州界破蕩族帳以遏侵擾上以邊候興兵或致生事止令文質偵邏密為之備

壬寅上御崇政殿親試禮部奏名舉人命官考覆如常例授三班奉職者九十二人借職者十三人其不合格者補諸州上佐文學自奉職至殿侍悉免短使與家便

差遣

丙午姜遵自陝西還言知襄州夏竦撫俗有方莅事無
滯詔獎之又言知階州許申知文州胡靖知三泉縣房
中正皆有治績詔審官院記姓名代還日升陟任使胡靖
房中正
未見

戊申判吏部流內銓陳堯咨言舊制河北河東緣邊幕
職州縣官不許挈家赴任代還日免其守選近準赦文
並許挈家赴任儻官滿日仍舊免選注近官頗為優倖

請自今依江浙荆湖遠地得替例守選從之 詔樞密

院凡給賜錢銀每季進納數目劄子自今歲作一冊進

內 詔牛羊司三棧圈自今只差三班使臣勾當內侍

省勿差

嘉祐四年
六月可考



